

**Sumáriu Kazu
Tribunál Distritál Baukau
Outubru 2020**

Afirmasaun: Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru feto no ema vulneravel. JSMP afirma la iha justifikasaun ba kualkér violénsia hasoru feto.

A. Sumáriu prosesu julgamentu kazu iha Tribunál Distritál Baukau

1. Totál kazu ne'ebé JSMP monitoriza: 36

Artigu	Tipu Kazu	Númeru
Artigu 145 Kódigu Penál (KP) & artigu 2, 3, no 35 letra (b) (LKVD)	Ofensa ba integridade física simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika sira no artigu 36 kona-ba krime sira violénsia doméstika nian hanesan krime públiku)	19
Artigu 145 KP & artigu 2, 3, no 35 letra (b) LKVD, artigu 157 KP no artigu 20 (1) Lei Arma Brankas	Ofensa ba integridade física simples ho natureza violénsia doméstika, ameasa no arma brankas	1
Artigu 145 KP & artigu 2, 3, no 35 letra (b) LKVD, artigu 157 KP	Ofensa ba integridade física simples ho natureza violénsia doméstika no ameasa	1
Artigu 139 KP, artigu 2, 3, no 35 letra (b) LKVD no artigu 2 nú.1 (f) no 20 husi Lei Nú. 5/2017 Lei Arma Brankas	Omisídui agravadu ho natureza violénsia doméstika no arma brankas	2
Artigu 154 KP & artigu	Maus-tratus ba kónjuje	5

Rua Beco Lakateu, Aldeia Manufuik,
SukuColmera, Administrativu Vera Cruz

Dili Timor Leste

PoBox: 275

Telefone: 3323883 | 77040735

www.jsmp.tl
ana@jsmp.tl

Facebook: www.facebook.com/timorleste.jsmp

Twitter: @JSMPtl

2, 3, no 35 letra (b) (LKVD)		
Artigu 177 (1) KP no artigu 182 alinea 1(a) KP	Abuzu seksuál ba menór ho agravasaun	1
Artigu 146(c) KP no artigu 20 (1), artigu 2 (2 alinea f) Lei Arma Brankas	Ofensa ba integridade física grave no arma brankas	1
Artigu 138 KP, artigu 32, no konjuga ho Artigu 20 (1) no (2)	Tentativa omisídui simples no arma brankas	1
Artigu 243 KP	Obstrusaun ba autoridade pública	2
Artigu 146(c) KP, artigu 145 KP, artigu 258 no artigu 20 (1), artigu 2 (2 alinea f) Lei Arma Brankas	Ofensa ba integridade física grave, ofensa ba integridade física simples, danu simples no arma brankas	1
Artigu 19 (1) no artigu 20 (1), artigu 2 (2) husi Lei Arma Brankas Nú. 5/2017	Rama ambon no arma brankas	1
Artigu 146 (c) (KP), no artigu 20 (1), artigu 2 (2 alinea f) Lei Arma Brankas	Ofensa ba integridade física grave no arma brankas	1
Totál		36

2. Totál desizaun ne'ebé JSMP monitoriza: 27

Tipu desizaun	Artigu	Númeru
Suspensaun ba prizaun nia ezekusaun	Artigu 68 KP	15
Pena multa	Artigu 67 KP	6
Pena prizaun	Artigu 66 KP	3
Suspensaun ba prizaun nia ezekusaun no omologa	Artigu 68 KP	2
Suspensaun ba prizaun nia ezekusaun () no omologa	Artigu 68 KP	1
Total		27

3. Totál kazu ne'ebé sei kontinua prosesu tuir JSMP nia monitorizasaun: 9

B. Deskrisaun sumáriu ba desizaun kazu sira ne'ebé JSMP monitoriza:

1. Krime ofensa ba integridade física simples ho natureza violénsia doméstika

Nú. Prosesu	: 0100/19. BCBCV
Kompozisaun Tribunál	: Singulár
Juis	: Dr. José Gonçalves
Prokuradór	: Dr. Ambrosio Rangel Freitas
Defeza	: Dr. Sidonio Maria Sarmento
Desizaun	: Pena prizaun fulan 3 suspende ba tinan 1

Iha 01 Outubru 2020, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu CXF hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 05 Outubru 2019, iha oras tuku 21:00 kalan, arguidu husu lezada atu halo relasaun seksuál, maibé lezada lakohi nune'e arguidu tebe dala rua iha lezada nia kidun.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no deklara katak arrepende ninia hahalok ne'e. Arguidu mós deklara katak desde forma família iha tinan 2016 foin mak halo agresaun hasoru lezada. Arguidu hatutan katak mezmu to'o agora lezada ba hela tiha ho nia inan-aman sira, maibé arguidu hakarak nafatin simu lezada nu'udar nia feen no arguidu serbisu nu'udar agrícola.

Alende ne'e, lezada mós kontinua konfirma faktu sira iha akuzasaun no deklara katak seidauk di'ak malu ho arguidu tanba hakarak moris separa ho arguidu. Lezada mós konfirma ho arguidu nia deklarasaun katak to'o agora lezada hela ho nia inan-aman sira.

Alegasaun finál

Prokuradór haktuir katak arguidu konfesa faktu hotu iha akuzasaun nune'e mezmu arguidu no lezada hanesan feen-la'en maibé iha momentu ne'ebá lezada nia kondisaun la permite atu hatan arguidu nia pedidu. Alende ne'e, konsidera mós katak arguidu nia

hahalok ne'e forma livre no ho intensaun hakarak halo agresaun hasoru lezada no ikus lezada deside moris separa ho arguidu. Bazeia ba konsiderasaun sira ne'e, husu ba tribunál atu kondena arguidu ho pena prizaun fulan neen suspende ba tinan ida.

Iha parte seluk defeza husu ba tribunál atu konsidera sirskunstánsia atenuante sira hanesan konfisaun arguidu ba faktu sira, arguidu nia arrependimentu, primeiravés mai hatan iha tribunál no arguidu hakarak nafatin moris hamutuk ho lezada maibé lezada mak lakohi ona atu kontinua moris hamutuk ho arguidu. Tanba ne'e, husu ba tribunál aplika pena ne'ebé kma'an liu ba arguidu.

Desizaun

Depoisde avalia faktu sira hotu, tribunál prova katak arguidu tebe dala rua iha lezada nia kidun. Bazeia ba prova ne'e no tetu mós sirkunstánsia atenuante sira hanesan arguidu konfesa, arrepende ona ninia hahalok, nune'e tribunál kondena arguidu ho pena prizaun fulan tolu suspende ba tinan ida.

2. Krime tentativa omisídu simples no arma brankas

Nú. Prosesu	: 0032/19. BCLGA
Kompozisaun Tribunál	: Koletivu
Juis	: Dr. José Quintão Soares Celestino, Dra. Jumiati Freitas no Dra. Maria Modesta de Almeida Viera
Prokuradór	: Dr. Bartolomeu de Araújo
Defeza	: Dr. Sidonio M. Sarmento
Desizaun	: Pena prizaun tinan 5

Iha 05 Outubru 2020, Tribunál Distritál Baukau prezide julgamentu leitura akordaun ba krime tentativa omisídu simples no arma brankas ne'ebé envolve arguidu José da Silva hasoru lezadu Francisco da Silva, iha Munisípiu Baukau.

Akuzasaun Prokuradór

Prokuradór akuza katak iha 01 Outubru 2019, iha oras tuku 10:00 dadeer, arguidu rezolve problema dezintendimentu entre arguidu nia feen (MdS) no lezadu nia feen (OP) no ikus sira konsege simu malu no dame malu. Depoisde ne'e simu malu ne'e, iha oras tuku 18:00 lokraik, lezadu levanta problema foun ba lia-na'in sira katak iha 2017, arguidu halo relasaun seksuál ho lezadu nia feen (OP). Maibé lia-na'in sira dehan ba lezadu katak sira la iha kompeténsia atu rezolve problema refere. Depoisde rona tiha resposta ne'e, la kleur lezadu ho nia feen hamri'ik no fila ba uma.

Liutiha minitu balun, arguidu kaer katana ida no tuir lezadu ho nia feen. To'o iha lezadu nia uma, arguidu haree lezadu kadi hela tudik atu ba ko'a tua no la ko'alia buat ruma,

arguidu taa kedes dala ida iha lezadu nia ulun no taa dala ida iha lezadu nia knosen parte karuk. Arguidu tenta atu taa nafatin lezadu, maibé lezadu halai sees tiha husi arguidu.

Prokuradór akuza arguidu kontra artigu 138 KP kona-ba omisídu simples no artigu 23 KP kona-ba tentativa, konjuga ho artigu 20 nú. 2 (f) kona-ba Lei Arma Brankas.

Produsaun ba prova sira

Iha julgamentu, arguidu konfesa faktu sira iha akuzasaun no deklara liutan katak arguidu hakfodak no sente moe ba iha família no lia-na'in sira momentu lezadu apresenta atu rezolve tan problema kona-ba arguidu halo relasaun seksuál ho lezadu nia feen. Ho nune'e, momentu lezadu fila ba uma, arguidu mós ho katana tuir lezadu. Arguidu mós deklara katak momentu to'o iha lezadu nia uma, lezadu kadi hela tudik no hamri'ik atu sona fali arguidu. Tanba ne'e, arguidu taa dala ida iha lezadu nia ulun no taa dala ida iha knosen parte karuk. Arguidu kontinua deklara katak to'o agora sira seidauk di'ak malu tanba arguidu iha prizaun preventiva, arguidu foin primeiravés mai hatan iha tribunál, promete sei la halo tan krime iha futuru no nu'udar agrikultór rendimentu hodi sustenta de'it família.

Entretantu, lezadu deklara katak semana ida antes atu ba rezolve problema dezintendimentu entre lezadu nia feen no arguidu nia feen, lezadu ko'alía ba nia feen dehan katak "*hau agora moras, hau nia isin tuun loos no forsa la iha, ne'e keta tanba ó amante ho mane seluk karik*". Ho nune'e, lezadu nia feen konfesa ba lezadu katak iha 2017 nia no arguidu halo duni relasaun seksuál.

Lezadu esclarese liutan katak nia apresenta kestaun ida ne'e ba iha lia na'in sira atu rezolve problema ne'e maibé tanba arguidu komesa tuur la metin ona nune'e lezadu dehan ba arguidu no lia-nain sira katak ne'e problema uma laran depois mak ko'alía neneik. Iha lokraik lezadu ho nia feen ba ona sira nia uma no lezadu mós kadi hela tudik atu ba ko'a tua no arguidu mós mai no taa kedes dala ida iha lezadu nia ulun no taa dala ida iha knosen parte karuk hafoin arguidu halai ba iha viziňu ida nia uma laran no família barak mai lori lezadu ba Sentru Saúde Laga no kontinua ba Ospitál Regionál Baukau.

Alegasaun finál

Prokuradór haktuir katak arguidu konfesa faktu hotu tuir akuzasaun prokuradór nian no lezadu mós kontinua konfirma faktu sira ne'e. Tanba ne'e, entrega ba tribunál atu kondena arguidu ba krime rua ne'ebé arguidu komete.

Entretantu defeza haktuir katak durante ne'e arguidu la hatene kona-ba problema refere maibé derrepente lezadu aprezenta problema ne'e perante família nune'e prejudika tebes arguidu nia dignidade halo arguidu sente moe. Kona-ba faktu sira iha akuzasaun, arguidu konfesa, arrepende ninia hahalok ne'e, foin primeiravés no mai hatan iha tribunál. Tanba ne'e, husu ba tribunál aplika pena ne'ebé adekuadu ba arguidu.

Desizaun

Depoisde avalia faktu sira, tribunál prova katak arguidu ho katana taa dala ida iha lezadu nia ulun no taa dala ida iha knosen parte karuk. Arguidu tenta nafatin atu taa lezadu maibé lezadu halai sees tiha husi arguidu. Bazeia ba faktu provadu ne'e no tetu mós sirkunstánsia atenuante sira hanesan arguidu konfesa, arrepende ona ninia hahalok no foin primeiravés mai hatan iha tribunál, nune'e tribunál kondena arguidu ho pena prizaun tinan haat ba krime tentativa omisídu simples no kondena arguidu ho pena prizaun tinan tolu ba krime arma brankas. Husi pena ba krime rua ne'e, tribunál halo akomulasaun jurídiku no kondena arguidu ho pena úniku tinan lima iha prizaun.

3. Krime maus-tratus ba kónjuje

Nú. Prosesu	: 0031/19. BCBCV
Kompozisaun Tribunál	: Koletivu
Juis	: Dra. Jumiaty Freitas, Dra. Florensia Freitas no Dr. José Quintão Soares Celestino
Prokuradór	: Dra. Remizia de Fatima da Silva
Defeza	: Dr. Sidonio M. Sarmento
Desizaun	: Pena prizaun tinan 2 suspende ba tinan 2 fulan 6

Iha 06 Outubru 2020, Tribunál Distritál Baukau prezide julgamentu leitura akordaun ba krime maus-tratus ba kónjuje ne'ebé envolve arguidu AFS hasoru nia feen, iha Munisípiu Baukau.

Akuzasaun Prokuradór

Prokuradór akuza katak 01 Marsu 2019, iha oras tuku 16:30 lokraik, arguidu hirus lezada no tuku dala tolu iha lezada nia reen-toos parte karuk, tebe dala ida iha lezada nia sorin parte karuk. Momentu lezada halai ba hakneak iha ortoriu oin, arguidu tuir no lees lezada nia roupa, nune'e lezada hakneak iha arguidu nia ain no koa'lia ba arguidu dehan "*hau la sala buat ida tanba sa ó halo moe hau hanesan ne'e*". Maski lezada hakneak iha arguidu nia ain no koa'lia hanesan ne'e, arguidu kontinua dada no rakut lezada nia tilun no dehan ba lezada katak "*ó nia tilun ne'e mak ko'alia la rona no ó nia matan ne'e buka fihir ema de'it*". Antes agresaun ne'e, arguidu no lezada diskute malu tanba arguidu la konkorda ho lezada nia roupa ne'ebé lezada hatais ba misa.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6, konjuga ho artigu 2, 3(a), 35(a) no 36 LKVD.

Produsaun ba prova sira

Iha prosesu julgamentu, arguidu deklara katak iha momentu ne'e arguidu ba hasoru lezada ne'ebé fila kalan ona husi misa. Iha dalan, arguidu uza lampra leno ba dalan maibé lezada la'o sees tiha nune'e arguidu dehan ba lezada katak lezada la'o sala ona no lezada hatan ba arguidu katak komforme nia. Arguidu esclarese liutan katak husi ne'e sira hahú diskute malu no to'o iha uma arguidu haree lezada hatais vestidu ne'ebé badak loos nune'e arguidu nervozu no lees tiha lezada nia vestidu, sutian no roupa laran no halo agresaun hasoru lezada tuir faktu sira iha akuzasaun.

Arguidu hatutan katak foin primeiravés mai hatan iha tribunál, depoisde akontesimentu ne'e sira di'ak malu kedes, arrepende ninia hahalok ne'e no promete iha futuru sei la halo tan agresaun hasoru membru família sira.

Nune'e mós lezada kontinua konfirma faktu sira iha akuzasaun no hatutan tan katak depoisde agresaun ne'e lezada ba hela tiha iha uma mahon durante semana tolu hafoin fila ba uma no to'o agora arguidu la repete ninia hahalok ne'e.

Alegasaun finál

Prokuradór haktuir katak arguidu provadu komete krime tuir faktu sira iha akuzasaun nune'e halo lezada sente ladun confortavel ho arguidu ninia hahalok ne'e no ba hela tiha iha uma mahon durante semana tolu, maibé tanba arguidu mós arrepende ninia hahalok ne'e no foin primeiravés mai hatan iha tribunál, husu ba tribunál atu kondena arguidu ho pena prizaun tinan rua suspende ba tinan rua.

Alende ne'e, defeza mós konsidera arguidu nia konfisaun ba faktu sira, foin primeiravés mai hatan iha tribunál, arrepende ona ninia hahalok no di'ak malu ona ho lezada. Tanba ne'e, husu ba tribunál aplika pena ne'ebé adekuadu ba arguidu.

Desizaun

Depoisde avalia faktu sira hotu, tribunál prova katak arguidu tuku dala tolu iha lezada nia reen-toos parte karuk, tebe dala ida iha lezada nia sorin parte karuk, lees lezada nia roupa hotu ne'ebé nia hatais no mós dada no rakut lezada nia tilun. Bazeia ba faktu sira provadu ne'e no tetu mós sirkunstânsia atenuante sira hanesan arguidu konfesa no arrepende ona ninia hahalok, nune'e tribunál konklui prosesu ne'e no kondena arguidu ho pena prizaun tinan rua suspende ba tinan rua fulan neen.

4. Krime ofensa ba integridade física simples ho natureza violénsia doméstika

Nú. Prosesu : 0032/19. LASIC

Kompozisaun Tribunál	: Singulár
Juis	: Dra. Jumiaty Freitas
Prokuradór	: Dr. Julio da Silva Correia
Defeza	: Dr. Grigório de Lima
Desizaun	: Pena multa US\$ 45.00

Iha 13 Outubru 2020, Tribunál Distritál Baukau liuhusi julgamentu movel iha Munisípiu Lautein (Lautem) prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguida MdJ hasoru nia la'en, iha Munisípiu Lautein.

Akuzasaun Prokuradór

Prokuradór akuza katak iha 23 Abril 2019, iha oras tuku 21:00 kalan, arguida uza besi beton *12 mil* no baku dala ida iha lezadu nia ulun besik kanuruk, baku dala ida iha kotuk laran no baku dala ida iha kabaas parte loos. Antes agresaun ne'e, arguida la satisfas ho lezadu tanba lezadu fó de'it osan US\$80.00 ba arguida husi osan US\$100.00 iha arguidu nia liman.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguida deklara katak momentu ne'e sira diskute malu kona-ba osan nune'e lezadu tuku dala rua iha arguida nia ulun, basa dala rua iha arguida nia matan no buti dala rua iha arguida nia hirus-matan, hafoin arguida foti besi *beton* no baku dala ida iha lezadu nia ulun rezulta kanek no ran. Kona-ba baku iha kabaas, arguida deklara katak la baku no kanuruk arguida la temi. Desde sira forma família iha tinan 2007, iha ona oan na'in lima arguidu foin primeiravés baku lezadu. Arguida moris separa ona ho lezadu no agora arguida hela no faan sasan iha Dili. Arguida hatutan katak kona-ba agresaun sira husi lezadu hasoru arguida, sei julga ketak ka prosesa ketak ne'ebé lezadu nu'udar arguidu no arguida nu'udar lezada.

Entretantu lezadu deklara katak momentu ne'e lezadu iha osan US\$15.00 atu fó ba arguida maibé arguida ejize tenke fó osan US\$100.00 husi ne'e sira diskute malu no lezadu hadau arguida nia telemovel mak lezadu nia liman kona arguida nia hirus-matan hafoin arguida foti besi beton no baku dala ida iha lezadu nia ulun besik kanuruk no dala ida iha kotuk laran. Entretantu baku iha kabaas, lezadu la temi.

Alegasaun finál

Prokuradór haktuir katak arguida komete duni krime sira tuir faktu iha akuzasaun no arguida práтика krime ne'e ho livre. Ho konsiderasaun sira ne'e, atu prevene arguida nia

hahalok iha futuru, husu ba tribunál kondena arguida ho pena prizaun fulan tolu suspende ba tinan ida.

Entretantu, defeza haktuir katak presiza tau konsiderasaun ba arguida nia deklarasaun katak lezadu mak halo uluk agresaun hasoru arguida no tanba lezadu ninia hahalok ne'e, arguida deside moris separa ho lezadu. Alende ne'e, arguida foin primeiravés mai hatan iha tribunál no arrepende ona ninia hahalok. Tanba ne'e, husu ba tribunál aplika pena ne'ebé adekuadu ba arguidu.

Desizaun

Depoisde avalia faktu hotu, tribunál prova katak arguida uza besi beton ho medida 12 mil no baku dala ida iha lezadu nia ulun besik kanuruk rezulta ran no baku dala ida iha kotuk laran. Bazeia ba faktu provadu sira ne'e no tetu mós sirkunstânsia sira hotu, tribunál kondena arguidu ho pena multa US\$45.00 ne'ebé arguidu sei selu US\$1.00 kada loron durante loron 45. Tribunál mós fiksa pena alternativa durante loron 30 iha prizaun, bainhira arguidu la selu pena multa refere.

5. Krime ofensa ba integridade física simples ho natureza violénsia doméstika

Nú. Prosesu	: 0011/20. LASIC
Kompozisaun Tribunál	: Singulár
Juis	: Dra. Jumiaty Freitas
Prokuradór	: Dr. Julio da Silva Correia
Defeza	: Dr. Grigório de Lima
Desizaun	: Pena única fulan 10 suspende ba tinan 1 fulan 6

Iha 13 Outubru 2020, Tribunál Distritál Baukau liuhusi julgamentu movel iha Munisípiu Lautein prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu PdC hasoru nia feen, iha Munisípiu Lautein.

Akuzasaun Prokuradór

Prokuradór akuza katak iha 04 Marsu 2020, iha oras tuku 09:00 dadeer, lezada telefone ba arguidu nia amante hodi husu tuir kona-ba nia relasaun ho arguidu. Ho nune'e, arguidu la satisfas no basa dala ida iha lezada nia hasan no tuku dala rua iha kotuk laran. Tuir mai, iha 05 Marsu 2020, iha oras tuku 21:00 kalan, arguidu ho lezada kontinua diskute malu kona-ba problema hanesan no arguidu tebe dala rua iha lezada nia ulun parte loos no karuk, basa dala rua iha hasan parte loos no karuk no tebe dala tolu iha kidan.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamento, arguidu deklara katak faktu sira iha akuzasaun ne'e loos hotu. Arguidu mós deklara katak depoisde akontesimentu ne'e sira di'ak malu fali, forma família iha tinan 2013, iha oan na'in tolu, foin primeiravés baku lezada no promete sei la halo tan krime hasoru lezada ka membru família sira iha futuru. Arguidu hatutan katak arguidu nu'udar motorista *mikrolete* ho rendimentu kada fulan US\$150.00.

Alende ne'e, lezada kontinua konfirma faktu sira iha akuzasaun no konfirma mós ho arguidu nia deklarasau katak arguidu foin primeiravés halo agresaun hasoru lezada no to'o agora la halo ona agresaun hasoru lezada.

Alegasaun finál

Prokuradór haktuir katak arguidu provadu komete krime hasoru lezada bazeia ba arguidu nia konfisaun no lezada nia konfirmasaun ba faktu sira iha akuzasaun. Alende ne'e, konsidera katak tribunál lor-loron halo julgamento ba krime violénsia doméstika, tanba ne'e mezmu sira di'ak malu ona, husu nafatin atu fó pena ne'ebé bele prevene arguidu ninia hahalok krime no eduka mós komunidade ne'ebé besik arguidu. Ho konsiderasaun sira ne'e hotu, husu ba tribunál atu aplika pena prizaun tinan ida suspende ba tinan ida.

Entretantu defeza husu ba tribunál atu aplika pena ne'ebé justu ba arguidu ho konsiderasaun sira katak arguidu konfesa faktu sira, foin primeiravés mai hatan iha tribunál, di'ak malu ona ho lezada no to'o agora la baku ona lezada.

Desizaun

Depoisde avalia faktu hotu, tribunál mantein ho akuzasaun prokuradór nian no prova katak arguidu basa dala ida iha lezada nia hasan no tuku dala rua iha kotuk laran. Tribunál mós prova katak iha loron tuir mai, arguidu tebe dala rua iha lezada nia ulun parte loos no karuk, basa dala rua iha hasan parte loos no karuk, tebe dala tolu iha kidan. Bazeia ba faktu provadu sira ne'e no tetu mós sirkunstânsia sira hotu, tribunál kondena arguidu ho pena prizaun fulan 10 suspende ba tinan ida fulan neen.

6. Krime ofensa ba integridade física simples ho natureza violénsia doméstika

Nú. Prosesu	: 0027/16. LALALT
Kompozisaun Tribunál	: Singulár
Juis	: Dra. Florencia Freitas
Prokuradór	: Dr. Bartolomeu de Araújo

Defeza : Dr. Germano G. Ramos
Desizaun : Pena multa US\$30.00

Iha 13 Outubru 2020, Tribunál Distritál Baukau liuhusi julgamentu movel iha Munisípiu Lautein prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu VS hasoru nia feen, iha Munisípiu Lautein.

Akuzasaun Prokuradór

Prokuradór akuza katak iha 11 Setembru 2016, iha oras tuku 17:00 lokraik, lezada husu ba arguidu kona-ba relasaun arguidu ho feto seluk. Rona ne'e, arguidu la satisfas no tuku dala ida iha lezada nia kanuruk no buti dala ida iha kakorok.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no deklara katak desde sira forma família iha tinan 1998 no iha oan na'in sia arguidu foin mak halo agresaun hasoru lezada. Arguidu mós deklara katak arrepende ninia hahalok ne'e, serbisu nu'udar agrikultór ho rezultadu sustenta de'it ba família. Alende ne'e, arguidu hatutan katak lezada hola ona mane seluk no arguidu mós hola ona feto seluk no sira nia oan hela ho arguidu.

Nune'e mós lezada kontinua konfirma faktu sira iha akuzasaun inklui konfirma arguidu nia deklarasaun katak sira seidauk di'ak malu, lezada hela iha nia inan-aman no hola fali mane seluk no sira nia oan hotu hela ho arguidu.

Alegasaun finál

Prokuradór haktuir katak arguidu komete duni krime hasoru lezada ho forma livre no ho intensaun hakarak halo agresaun hasoru lezada, nune'e lezada deside moris fali ho mane seluk ne'ebé hadomi nia. Bazeia ba konsiderasaun sira ne'e, husu ba tribunál atu kondena arguidu ho pena prizaun fulan tolu suspende ba tinan ida.

Enkuantu defeza husu tribunál atu aplika pena ne'ebé adekudu ba arguidu ho konsiderasaun sira ba iha arguidu nia konfisaun, arguidu nia arrependimentu no primeiravés mai hatan iha tribunál.

Desizaun

Depoisde avalia faktu hotu, tribunál prova katak arguidu tuku dala ida iha lezada nia kanuruk no buti dala ida iha kakorok. Alende ne'e, tribunál mós tetu sirkunstánsia atenuante sira hanesan arguidu konfesa, arrepende ona ninia hahalok no foin primeiravés mai hatan iha tribunál, nune'e tribunál kondena arguidu ho pena multa US\$30.00. Pena ne'e arguidu sei selu kada Ioron US\$0.50 durante Ioron 60. Tribunál mós fiksa pena alternativa durante Ioron 30 iha prizaun, bainhira arguidu la selu pena multa refere.

7. Krime abuzu seksuál ba menór ho agravasaun

Nú. Prosesu	: 0001/19. BCVPN
Kompozisaun Tribunál	: Koletivu
Juis	: Dr. Dr. José António de Jesus Escurial da Silva Faria, Dr. José Gonçalves no Dra. Maria Modesta de Almeida Viera
Prokuradór	: Dr. Remizia de Fátima da Silva
Defeza	: Dr. Lino Lopes
Desizaun	: Pena prizaun tinan 8

Iha 13 Ouubru 2020, Tribunál Distritál Baukau prezide julgamentu leitura akordaun ba krime abuzu seksuál ba menór ho agravasaun ne'ebé envolve arguidu DF hasoru lezada ho idade menoridade, tinan 5 fulan 2, iha Munisípiu Baukau.

Akuzasaun Prokuradór

Prokuradór akuza katak iha 09 Maiu 2018, iha oras tuku 19:28 kalan, iha arguidu nia maun nia uma, arguidu bolu lezada ho nia tian atu hatudu filme iha arguidu nia telemovel kona-ba ‘tasi no buan’. Lezada mós tama ba uma laran no arguidu hiti lezada iha nia kelen leten no hatudu filme refere. Bainhira hiti lezada ne'e, arguidu nia liman loos kaer telemovel no liman karuk hatama ba lezada nia kalsa parte oin hodi lamas lezada nia orgaun seksuál. Aktu ne'e rezulta lezada nia orgaun seksuál moras no kanek ki'ik inklui halo lezada tauk no halai ba informa kedes ba iha nia inan-aman. Hafoin lezada nia aman foti lampra no leno ba lezada nia orgaun seksuál ne'ebé hatudu mean hanesan raan.

Prokuradór akuza arguidu kontra artigu 177(1) KP kona-ba abuzu seksuál ba menór ho moldura penál tinan 5 to'o tinan 20 no artigu 182 (a) KP kona-ba agravasaun.

Produsaun ba prova sira

Iha julgamentu, arguidu nega totalmente ba faktu sira iha akuzasaun no argumenta katak arguidu nia liman rua kaer hotu telefone momentu hatudu filme ne'e no pozisaun hamri'ik mak lezada iha liman loos no lezada nia tian iha liman karuk. Arguidu hatutan katak iha Ioron tuir mai polísia bolu arguidu ba Eskudra Polísia Venilale maibé arguidu

la hatene kona-ba problema refere. Arguidu mós deklara katak foin primeiravés mai hatan iha tribunál.

Entretantu lezada kontinua konfirma faktu sira iha akuzasaun¹.

Testemuña ASS nu'udar lezada nia inan depoimenta katak lezada informa ba testemuña hanesan haktuir iha akuzasaun nune'e testemuña fó hatene ba nia la'en (lezada nia aman) no nia la'en ho lampra leno no haree iha sinál mean (hanesan ran) iha lezada nia orgaun seksuál. Ho nune'e, sira informa kedes ba iha OPS (Ofisiál Polísia Suku) no kontinua ba Sentru Saúde Venilale no ba Pradet-Baukau. Testemuña hatutan katak akontesimentu ida ne'e ba dala tolu ona no lezada foin informa ba testemuña.

Testemuña SSF ho idade tinan hitu nu'udar lezada nia tian depoimenta katak testemuña mak hamutuk ho lezada haree arguidu nia telefone. Testemuña hamri'ik iha sorin no lezada hamri'ik iha arguidu nia liman rua nia klaran. Testemuña deklara liutan katak testemuña la haree no la hatene arguidu hatama liman ba lezada nia kalsa oin.

Alegasaun finál

Prokuradór haktuir katak arguidu nega faktu hotu ne'ebé imputa ba nia maibé lezada maski ho idade menóridade kontinua konfirma faktu sira iha akuzasaun no haforsa ho testemuña sira nia depoimentu. Ho konsiderasaun sira ne'e, husu ba tribunál atu kondena arguidu tuir hahalok ne'ebé nia halo hasoru lezada.

Entretantu defeza husu ba tribunál atu tetu no deside tuir faktu sira ne'ebé prodús iha produsaun ba prova sira inklui konsidera arguidu nia konfisaun no foin primeiravés mai hatan iha tribunál.

Desizaun

Depoisde avalia faktu hotu, tribunál prova katak arguidu hatama nia liman karuk ba iha lezada nia kalsa parte oin hodi lamas lezada nia orgaun seksuál rezulta lezada nia orgaun seksuál mean no raan. Alende ne'e, arguidu la'os foin primeiravés halo krime

¹ Iha prosesu produsaun ba prova sira, tribunál deside haruka arguidu sai husi sala audénsia bainhira rona deklarasaun lezada no testemuña sira. Aleinde ne'e, bainhira rona deklarasaun husi lezada no depoimentu husi testemuna (tian), tribunál bolu sira hakbesik ba iha juis sira nia fatin no dada-lia ka husu pergunta/ klarifikasiacaun ho lianguzen ne'ebé simples hanesan konverse babain. Ho nune'e lezada no testemuña confortavel atu ko'alia.

ne'e. Bazeia ba faktu provadu sira ne'e no tetu sirkunstánsia sira hotu, tribunál kondena arguidu ho pena prizaun tinan ulu.

8. Krime maus-tratus ba kónjuje

Nú. Prosesu	: 0016/19. BCBCV
Kompozisaun Tribunál	: Koletivu
Juis	: Dr. José Quintão Soares Celestino Dra. Jumiaty Freitas no Dr. Maria Modesta de Almeida Viera
Prokuradór	: Dr. Julio da Silva Correia
Defeza	: Dr. Grigório de Lima
Desizaun	: Pena prizaun tinan 3 suspende ba tinan 3

Iha 13 Outubru 2020, Tribunál Distritál Baukau prezide julgamentu leitura akordaun ba krime maus-tratus ba kónjuje ne'ebé envolve arguidu CF (iha prizaun²) hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 15 Setembru 2019, iha oras tuku 07:00 dadeer, lezada te'in hela etu no haruka sira nia oan hakiak fase bikan. Haree sira nia oan ne'e fase hela bikan, arguidu la konkorda no tolok lezada no dehan ba lezada katak "nu'usá mak haruka fali labarik fase bikan?". Rona arguidu tolok, lezada hatan arguidu katak tanbasá mak tenke tolok. Arguidu la simu no tuku dala ida iha lezada nia ulun parte kotuk nune'e lezada halai tiha ba sira nia kantadeiru ne'ebé besik sira nia uma. Arguidu tuir lezada, kontinua tolok no basa dala ida iha lezada nia hasan parte loos no dala ida iha hasan parte karuk. Depoisde ne'e lezada fila ba uma maibé tanba ta'uk lezada halai ba tiha iha nia kuiñada (arguidu nia feton) nia uma no toba iha ne'ebá.

Iha 16 Setembru 2019, iha oras tuku 11:00 dadeer, arguidu ba tuir lezada iha nia feton ne'e nia uma no haruka lezada fila ba sira nia uma maibé tanba tauk lezada halai tama tiha ba iha nia kuiñada nia kuartu laran. Arguidu tuir ba kuartu laran no buti lezada nia kakorok, rasta lezada ba veranda no uza katana ne'ebé arguidu kaer hela atu taa lezada maibé arguidu nia feton kaer tiha arguidu nia liman. Mezmu nune'e, katana konsege kona kois iha lezada nia ulun tanba arguidu nafatin se katana ba iha lezada nia ulun.

² Arguidu agora dadaun kumpri kumpri hela pena tinan 8 iha prizaun ba kazu tentativa omisíduu simples ho natureza violénsia doméstika no arma brankas hasoru mós nia feen. Kazu ne'e ho nú. Prosesu : 0060/19. BCSIC. Informasaun kompletu bele asesu iha website jsmp : www.jsmp.tl
iha parte publikasaun Sumáriu Kazu Mensal, Tribunál Distritál Baukau - Julu 2020.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6, konjuga ho artigu 2, 3(a), 35(a) no 36 LKVD.

Produsaun ba prova sira

Iha julgamentu, arguidu deklara katak faktu sira ne'ebé akuza ba nia ne'e loos hotu. Liutan arguidu deklara katak depoisde akontesimentu ne'e sira di'ak malu fali maibé arguidu hatutan katak agora dadaun arguidu kumpri hela pena iha tinan ualu iha prizaun ba krime seluk ne'ebé arguidu komete depoisde krime ida ne'e. Arguidu hateten katak arrepende ninia hahalok sira ne'e hotu no promete ba futuru sei la komete tan kualkér krime hasoru família ka ema seluk.

Entretantu lezada kontinua konfirma faktu sira hotu iha akuzasaun no deklara katak depoisde akontesimentu ne'e sira di'ak malu fali. Maibé ba akontesimentu ne'ebé to'o arguidu tenke kumpri pena iha prizaun, lezada deside perante tribunál hakarak moris separa ho arguidu no lezada agora hela hamutuk ho nia inan-aman sira.

Testemuña MFF nu'udar lezada nia kuiñada depoimenta tuir faktu iha akuzasaun no depoimenta liutan katak testemuña haketak tiha arguidu no lezada, lezada hamri'ik iha testemuña nia kotuk no arguidu hamri'ik iha nia oin no bainhira arguidu hit sae katana mak kona iha lezada nia ulun la'os taa.

Alegasaun finál

Prokuradór haktur katak arguidu komete duni krime tuir faktu sira iha akuzasaun. Arguidu komete krime ne'e ho livre no vontade rasik hasoru lezada. Tanba ne'e, husu ba tribunál atu kondena arguidu ho pena prizaun tinan tolu suspende ba tinan haat.

Entretantu, defeza husu ba tribunál atu aplika pena ne'ebé adekuadu ba arguidu bazeia ba sirkunstánsia atenuante sira hanesan arguidu konfesa faktu hotu ne'ebé imputa ba nia no arguidu promete ona sei la repete ninia hahalok ne'e iha futuru.

Desizaun

Depoisde avalia faktu sira hotu, tribunál prova katak arguidu tolok lezada, tuku dala ida iha lezada nia ulun parte kotuk, basa dala ida iha lezada nia hasan parte loos no basa dala ida iha hasan parte karuk. Tribunál mós prova katak arguidu buti lezada nia kakorok, dada sai lezada husi kuñada nia kuartu laran ba iha veranda no hi'it sae katana nune'e kona iha lezada nia ulun. Bazeia ba faktu provadu ne'e no mós tetu sirkunstánsia sira hotu, nune'e tribunál kondena arguidu ho pena prizaun tinan tolu suspende ba tinan tolu.

9. Krime obstrusaun ba autoridade públiku

Nú. Prosesu : 0032/16. LASIC

Kompozisaun Tribunál	: Koletivu
Juis	: Dra. Jumiaty Freitas, Dr. José Goncalves no Dra. Sribuana da Costa
Prokuradór	: Dr. Bartolomeu de Araújo
Defeza	: Dr. Germano G. Ramos
Desizaun	: Pena prizaun tinan 3 suspende ba tinan 3

Iha 13 Outubru 2020, Tribunál Distritál Baukau liuhusi julgamentu movel iha Munisípiu Lautein prezide julgamentu leitura akordaun ba krime obstrusaun ba autoridade públiku ne'ebé envolve arguidu Bento de Jesus nu'udar membru F-FDTL hasoru lezadu Leonildo José Cristovão nu'udar Komandante Eskuadra PNTL Lospalos, iha Munisípiu Lautein.

Akuzasaun Prokuradór

Prokuradór akuza katak iha 29 Outubru 2016, iha oras la apuradu, arguidu ho kareta ba iha Eskuadra Polísia Lospalos. Arguidu tun husi kareta no hasoru kelas testemuña Rogeiro Maria Lopes Caetano no Tito da Silva. Arguidu hateten ba sira katak “*agora hau tiru mate imi hotu*”. Koa'lia tiha hanesan ne'e, arguidu ba loke odamatan kareta nian no hasai kilat no buka lezadu maibé lezadu iha hela nia sala serbisu. Bainhira lezadu sai mai liur, arguidu see kelas kilat ba lezadu no dehan ba lezadu katak “*agora ó mate...(tolok)*, ó *nia ulun fatuk hau tiru rahun*”. Momentu arguidu atu buti gatilu, lezadu baku sae tiha kilat refere no kilat tarutu no rezulta *plafon* no kalen kuak. Hafoin, lezadu ho nia membru sira hadau tiha kilat husi arguidu no hatama arguidu ba selo laran hodi halo prosesu hasoru arguidu.

Prokuradór akuza arguidu kontra artigu 138 KP kona-ba omisídu simples no artigu 23 KP kona-ba tentativa no artigu 24 KP kona-ba tentativa nia punibilidade.

Produsaun ba prova sira

Iha prosesu julgamentu, arguidu deklara katak iha momentu ne'e arguidu ho kondisaun lanu todan no uza kareta F-FDTL, lori kilat no hatais roupa sivíl ba iha eskuarda polísia ho intensaun atu husu tuir kona-ba alin nia motor ne'ebé polísia prende tiha maibé polísia sira la autoriza no hateten ba arguidu katak sei prosesu hela. Arguidu hatutan katak momentu lezadu hakilar katak arguidu iha kilat nune'e Rogerio hako'ak kelas arguidu husi kotuk no hadau malu kilat ho arguidu. Momentu hadau malu ne'e, arguidu nia liman fuan iha gatilu no buti sala gatilu no kilat tiru sae ba leten kona *plafon* no kalen. Liutan arguidu deklara katak la see kilat ba lezadu no agora dadaun arguidu demite ona husi F-FDTL no halo vida nu'udar agrikultór.

Alende ne'e, lezadu deklara katak iha momentu ne'e polísia sira halo hela seguransa tanba iha loran ida tuir mai iha elisaun ba xefe suku sira. Bainhira halo hela seguransa ne'e, polísia sira konsege prende arguidu nia alin ne'ebé kondús motor la uza kapasete inklui motor barullu tanba *knal-pot raising*. Lezadu deklara liutan katak arguidu ho kareta F-FDTL nian ho kilat mai hakilar dehan komandante iha ne'ebé nune'e lezadu sai husi eskritóriu laran no arguidu see kelas kilat ba lezadu nune'e lezadu mós kaer tiha kilat nia tutun no foti sae ba leten hafoin ajente Rogerio husi kotuk hako'ak metin arguidu no hadau malu kilat ne'e no derrepente kilat tarutu. Lezadu hatutan katak ajente Rogerio konsege hadau tiha kilat refere no soe ba ajente Tito hafoin lezadu kontaktu Maijor Jeneral Lere Anan Timur no kalan ne'e kelas Polísia Militár to'o iha eskuadra no lori arguidu ba detein iha PNTL Baukau.

Testemuña Rogerio Maria Lopes konfirma faktu iha akuzasaun no kontinua depoimenta katak arguidu lori kilat, hakilar no tolok nia komandante, nune'e testemuña husu ba arguidu atu kalma maibé bainhira lezadu sai mai arguidu see kelas kilat ba lezadu nia reen-toos no tuir mai akontese hanesan haktuir ona iha akuzasaun no deklarasaun lezadu nian.

Alegasaun finál

Prokuradór haktuir katak bazeia ba produsaun ba prova, husu atu halo kualifikasaun jurídiku atu aumenta tan artigu 243 KP kona-ba krime obstrusaun ba autoridade públiku tanba arguidu ninia hahalok ne'e impede polísia nia serbisu ne'ebé iha momentu ne'ebá asegura hela elisaun xefe suku nian. Bazeia ba konsiderasaun sira ne'e, husu ba tribunál atu kondena arguidu ho pena únika prizaun tinan lima.

Enkuantu defeza haktuir katak arguidu ho kondisaun lanu no ba iha eskuadra polísia ho intensaun atu husu tuir deit nia alin nia motor no laiha intensaun atu tiru lezadu. Kilat tarutu tanba lezadu nia membru sira hako'ak arguidu husi kotuk no arguidu nia liman kona gatilu kilat no tarutu ona mak arguidu foin hakfodak. Alende ne'e, arguidu ninia hahalok ne'e la impede lezadu nia serbisu, nune'e konsidera arguidu ninia hahalok ne'e la prense krime obstrusaun ba autoridade públiku. Arguidu mós arrepende ona ninia hahalok, foin primeiravés mai hatan iha tribunál no arguidu agora hala'o vida nu'udar agrikultór. Tanba ne'e, husu ba tribunál aplika pena ne'ebé adekuadu ba arguidu.

Desizaun

Depoisde avalia faktu hotu, tribunál prova katak arguidu hakilar atu tiru rahun lezadu nia ulun fatuk, nune'e lezadu kaer tiha kilat tutun no dudu sae. Haree situasaun ne'e, ajente polísia Rogerio hako'ak arguidu husi kotuk no konsege hadau malu kilat ho arguidu to'o kilat tarutu rezulta plafon no kallen ko'ak. Bazeia ba razaun hirak ne'e, tribunál halo alterasaun jurídiku husi artigu 23, 24 no 138 KP kona-ba tentativa omisídu simples ba

fali artigu 243 KP kona-ba krime obstrusaun ba autoridade públiku. Tribunál tetu mós sirkunstánsia atenuante sira hanesan arguidu konfesa, arrepende ona ninia hahalok no foin primeiravés mai hatan iha tribunál, nune'e tribunál kondena arguidu ho pena prizaun tinan tolu suspende ba tinan tolu.

10. Krime ofensa ba integridade física simples ho natureza violénsia doméstika

Nú. Prosesu	: 0027/19. LASIC
Kompozisaun Tribunál	: Singulár
Juis	: Dr. José Gonçalves
Prokuradór	: Dr. Julio da Silva Correia
Defeza	: Dr. Grigório de Lima
Desizaun	: Pena multa US\$ 60.00

Iha 14 Outubru 2020, Tribunál Distritál Baukau liuhusi julgamentu movel iha Munisípiu Lautein prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu OdC hasoru nia feen primeiru, iha Munisípiu Lautein.

Akuzasaun Prokuradór

Prokuradór akuza katak iha 19 Maiu 2019, iha oras tuku 13:00 meiudia, lezada diskute malu ho arguidu nia feen segundu kona-ba prepara bee manas. Ho nune'e, arguidu uza xavi kareta nian no baku dala ida iha lezada nia kabaas no baku dala ida iha kanotak.

Prokuradór akuza arguidu kontra artigu 145 KP kona-ba krime ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no36 LKVD.

Produsaun ba prova sira

Iha prosesu julgamentu, arguidu konfesa faktu sira iha akuzasaun no deklara katak arrepende ninia hahalok ne'e. Arguidu mós deklara katak depoisde akontesimentu ne'e sira di'ak malu fali. Arguidu hatutan foin primeiravés baku lezada, forma família ho lezada desde tinan 2008 no iha oan na'in lima, nu'udar motorista baskolante ho rendimentu kada fulan US\$ 200.00.

Alende ne'e, lezada mós kontinua konfirma faktu sira iha akuzasaun inklui konfirma arguidu nian deklarasau katak sira di'ak malu to'o agora no kontinua hela hamutuk ho arguidu inklui arguidu nia feen segundu.

Alegasaun finál

Prokuradór haktuir katak arguidu konfesa ninia hahalok no lezada konfirma faktu sira ne'e, nune'e husu ba tribunál atu fó kastigu ne'ebé bele prevene arguidu nia hahalok

iha futuru no tanba arguidu iha kapasidade finaseiru, husu ba tribunál kondena arguidu ba pena multa US\$60.00.

Entretantu defeza husu ba tribunál atu aplika pena ne'ebé adekuadu ba arguidu bazeia ba sirkunstánsia atenuante sira hanesan arguidu foin primeiravés mai hatan iha tribunál, di'ak malu ona ho lezada, arrepende ninia hahalok ne'e no promete la komete tan ninia hahalok ne'e iha futuru. Alende ne'e, arguidu mak sustenta nesesidade família nian.

Desizaun

Depoisde avalia faktu hotu, tribunál prova katak arguidu lori xavi kareta nian no baku dala ida iha lezada nia kabaas no baku dala ida iha kanotak. Bazeia ba prova ne'e no tetu mós sirkunstánsia atenuante sira hanesan arguidu konfesa, arrepende ona ninia hahalok, foin primeiravés mai hatan iha tribunál no di'ak malu ona ho lezada, nune'e tribunál konklui prosesu ne'e no kondena arguida ho pena multa US\$60.00. Pena ne'e arguidu sei selu US\$1.00 kada loron durante loron 60. Bainhira arguidu la selu pena multa ne'e, arguidu sei kumpri iha prizaun durante loron 40 nu'udar pena alternativa.

11. Krime arma brankas, ameasa no ofensa ba integridade física simples ho natureza violénsia doméstika

Nú. Prosesu	: 0004/19. VQWCB
Kompozisaun Tribunál	: Koletivu
Juis	: Dra. Jumiati Freitas Dra. Florencia Freitas no Dra Sribuana da Costa
Prokuradór	: Dr. Bartolomeu de Araújo
Defeza	: Dr. Germano Guterres Ramos
Desizaun	: Pena prizaun tinan 1 suspende ba tinan 1 no absolve

Iha 14 Outubru 2020, Tribunál Distritál Baukau liuhusi julgamentu movel iha Munisípiu Lautein prezide julgamentu leitura sentensa ba krime arma brankas, ameasa no ofensa ba integridade física simples ho natureza violénsia doméstika ne'ebé envolve arguidu RX hasoru nia feen, iha Munisípiu Lautein.

Akuzasaun Prokuradór

Prokuradór akuza katak iha 16 Janeiru 2019, iha oras tuku 15:00 lokraik, lezada ba dada nia fahi iha arguidu nia feen segundu nia uma. Fahí ne'e lakon liu loron haat ona no lezada hetan fali iha arguidu nia feen segundu nia uma ne'ebé kesi metin tiha ona. Ho nune'e, arguidu ho katana taa tali refere atu halo tali kotu no bainhira arguidu taa tan dala ida, katana kona iha lezada nia liman fuan parte klaran.

Prokuradór akuza arguidu kontra artigu 157 KP kona-ba krime ameasa, ho moldura penál to'o tinan 1 ka multa kontra artigu 145 KP kona-ba krime ofensa ba integridade fizika simples ho moldura penál to'o tinan 3 ka multa, konjuga ho artigu 2, 3, 35(a) LKVD no artigu 20 nú.1 husi Lei Arma Brankas.

Antes tama ba produsaun ba prova sira, bazeia ba artigu 262 Kódigu Prosesu Penál (KPP) kona-ba tentativa konsiliaсаun, tribunál halo tentativa konsiliaсаun ba arguidu ho lezada relasiona ho krime ameasa tanba kazu ne'e klasifika nu'udar krime semi-públiko no nia prosedimentu depende ba keixa.

Iha prosesu konsiliaсаun ne'e, lezada no arguidu deklara katak problema ne'e sira rezolve ona tuir tradisaun. Ho nune'e, lezada hakarak deziste tiha nia keixa hasoru arguidu. Bazeia ba konkordánsia husi parte rua ne'e, tribunál omologa keixa ne'e. Entretantu ba krime ofensa ba integridade fizika simples ho natureza violénsia doméstika no arma brankas, tribunál kontinua halo prosesu julgamentu.

Produsaun ba prova sira

Iha julgamentu, arguidu deklara katak momentu ne'e arguidu ko'a fahi nia tali mak kona iha lezada nia liman. Arguidu mós deklara katak arguidu husu ona deskulpa nune'e sira di'ak malu ona to'o agora, arguidu mós arrepende ninia hahalok no foin primeiravés mai hatan iha tribunál.

Nune'e mós lezada kontinua konfirma faktu sira balun kona-ba dada fahi iha arguidu nia feen segundu inklui arguidu konfirma arguidu nia deklarasaun katak arguidu ko'a tali ne'ebé hodi kesi fahi mak ko'a kona lezada nia liman fuan. Alende ne'e, konfirma mós arguidu nia deklarasaun katak sira di'ak malu ona no to'o agora arguidu la baku ona lezada.

Alegasaun finál

Prokuradór haktuir katak arguidu ko'a tali mak kona iha lezada nia liman no faktu ne'e lezada mós konfirma, mezmu sira di'ak malu maibé atu prevene arguidu ninia hahalok iha futuru, husu ba tribunál atu kondena arguidu tuir nia hahalok.

Entretantu, defeza husu ba tribunál atu aplika pena ne'ebé justu ba arguidu ho konsiderasaun sira ba iha arguidu nia konfisaun, arependimentu, primeiravés mai hatan iha tribunál no di'ak malu ona ho lezada.

Desizaun

Depoisde avalia faktu hotu, tribunál prova katak momentu arguidu ho katana ko'a tali ne'ebé uza hodi kesi fahi mak ko'a kona iha lezada nia liman fuan. Bazeia ba prova sira ne'e no tetu mós sirkunstánsia atenuante sira hanesan arguidu konfesa, arrepende

ninia hahalok, foin primeiravés mai hatan iha tribunál no di'ak malu ona ho lezada, nune'e tribunál kondena arguidu ba krime ofensa ba integridade fizika simples ho natureza violénsia doméstika ho pena prizaun tinan ida suspende ba tinan rua. Entretantu ba krime arma brankas tribunál absolve arguidu.

12. Krime ofensa ba integridade física simples ho natureza violénsia doméstika

Nú. Prosesu	: 0082/19. LASIC
Kompozisaun Tribunál	: Singulár
Juis	: Dr. José Gonçalves
Prokuradór	: Dr. Julio da Silva Correia
Defeza	: Dr. Germano G Ramos
Desizaun	: Pena multa US\$180.00

Iha 14 Outubru 2020, Tribunál Distritál Baukau liuhusi julgamentu movel iha Munisípiu Lautein prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu JVL hasoru nia feen, iha Munisípiu Lautein.

Akuzasaun Prokuradór

Prokuradór akuza katak iha 13 Setembru 2019, iha oras tuku 13:00 lokraik, arguidu uza ai-sar nia kain no baku dala barak iha lezada nia kotuk laran, liman kabun parte karuk no liman fuan, tuku dala rua iha lezada nia kotuk laran no tuku dala rua iha ulun. Antes agresaun ne'e, lezada (mestra) foin fila husi eskola no tama liu ba kuartu laran. Arguidu tama tuir lezada ba kuartu laran no halo agresaun sira ne'e.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu sira iha akuzasaun prokuradór nian no deklara katak arrepende ninia hahalok ne'e. Arguidu mós deklara katak foin primeiravés halo agresaun hasoru lezada, depoisde akontesimentu ne'e sira di'ak malu fali no promete iha futuru sei la baku tan lezada. Arguidu hatutan katak nu'udar na'in ba ofisina rendimentu kada fulan US\$400.00.

Entretantu lezada kontinua konfirma faktu sira iha akuzasaun no dekara mós katak di'ak malu ona ho arguidu no to'o agora arguidu la baku ona lezada.

Alegasaun finál

Prokuradór haktuir katak arguidu konfesa ninia hahalok, nune'e atu prevene arguidu la komete tan ninia hahalok hasoru lezada iha futuru no eduka komunidade ne'ebé besik arguidu, husu ba tribunál atu kondena arguidu ho pena multa US\$90.00.

Enkuantu defeza husu ba tribunál atu aplika pena ne'ebé adekuadu ba arguidu ho konsiderasaun ba iha arguidu nia konfisaun, arrependimentu, primeiravés mai hatan iha tribunál no di'ak malu ona ho lezada.

Desizaun

Depoisde avalia faktu hotu, tribunál prova katak arguidu uza ai-sar nia kain no baku dala barak iha lezada nia kotuk laran, liman kabun parte karuk no liman fuan. Tribunál mós prova katak arguidu tuku dala rua iha lezada nia kotuk laran no tuku dala rua iha ulun. Bazeia ba faktu provadu sira ne'e no tetu mós sirkunstânsia sira hotu, tribunál kondena arguidu ho pena multa US\$180.00 ne'ebé arguidu sei selu US\$2.00 kada loron durante loron 90. Bainhira arguidu la selu pena multa ne'e, arguidu sei kumpri iha prizaun durante loron 80 nu'udar pena alternativa.

13. Krime ofensa ba integridade física simples ho natureza violénsia doméstika

Nú. Prosesu	: 0017/20. MNMNT
Kompozisaun Tribunál	: Singulár
Juis	: Dr. José António de Jesus Escurial da Silva Faria
Prokuradór	: Dra. Remizia de Fátima da Silva
Defeza	: Dr. José Maria Caetano Guterres
Desizaun	: Pena multa US\$ 30.00

Iha 14 Outubru 2020, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu FEL hasoru nia feen, iha Munisípiu Manatuto.

Akuzasaun Prokuradór

Prokuradór akuza katak iha 16 Fevereiru 2020, iha oras tuku 01:00 madrugada, arguidu ho lezada diskute malu kona-ba lezada prepara (tein) hahan sempre tarde. Ho nune'e, arguidu tata lezada nia liman parte loos no tuku dala rua iha lezada nia kotuk laran.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklara katak di'ak malu ona ho lezada. Arguidu mós deklara liutan katak desde forma família iha

tinan 2016 arguidu foin mak halo agresaun hasoru lezada tanba ne'e arrepende ninia hahalok. Arguidu hatutan nu'udar motorista ba eskola nian arguidu nia vensimentu kada fulan US\$155.00.

Alende ne'e, lezada mós kontinua konfirma faktu sira iha akuzasaun inklui konfirma arguidu nia deklarasaun katak sira di'ak malu ona no to'o agora arguidu la baku ona lezada.

Alegasaun finál

Prokuradór haktuir katak arguidu provadu komete krime hasoru lezada ho forma livre no ho intensaun hakarak halo agresaun duni hasoru lezada tanba arguidu konfesa faktu sira iha akuzasaun no lezada mós konfirma faktu sira ne'e. Bazeia ba prova ne'e, husu ba tribunál atu kondena arguidu ho pena multa US\$50.00.

Enkuantu defeza husu ba tribunál atu konsidera arguidu nia konfisaun, arguidu nia arrependimentu no foin primeiravés mai hatan iha tribunál. Tanba ne'e, husu ba tribunál aplika pena multa maibé mínimu husi alegasaun prokuradór nian.

Desizaun

Depoisde avalia faktu hotu, tribunál prova katak arguidu tata lezada nia liman parte loos no tuku dala rua iha lezada nia kotuk laran. Bazeia ba faktu provadu sira ne'e no tetu mós sirkunstânsia sira hotu, tribunál kondena arguidu ho pena multa US\$30.00 ne'ebé arguidu sei selu US\$0.50 kada Ioron durante Ioron 60. Tribunál mós fiksa pena alternativa durante Ioron 40 prizaun, bainhira arguidu la kumpri pena multa refere.

14. Krime maus-tratus ba kónjuje

Nú. Prosesu	: 0003/19. BCPVN
Kompozisaun Tribunál	: Koletivu
Juis	: Dra. Jumiaty Freitas, Dra. Florencia Freitas no Dr. José Quintão Soares Celestino
Prokuradór	: Dra. Remizia de Fátima da Silva
Defeza	: Dr. José Maria Caetano Guterres
Desizaun	: Pena prizaun tinan 2 suspende ba tinan 2

Iha 19 Outubru 2020, Tribunál Distritál Baukau prezide julgamentu leitura akordaun ba krime maus-tratus ba kónjuje ne'ebé envolve arguidu MdC hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 20 Novembru 2019, iha oras tuku 08:00 dadeer, arguidu ho lezada diskute malu kona-ba labarik moras no nesesidade uma laran nian. Arguidu tuku dala lima iha lezada nia reen-toos, foti ai-dona no baku dala ida iha lezada nia ain kabun no basa dala iha oin parte karuk rezulta lezada oin nakukun no monu ba rai. Antes ne'e, iha tinan 2017, arguidu tuku dala rua iha lezada nia kotuk laran no basa iha kanuruk. Iha tinan 2018, arguidu mós basa lezada nia inus rezulta ran sai barak.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6 konjuga ho artigu 2, 3(a), 35(a) no 36 LKVD.

Produsaun ba prova sira

Iha prosesu julgamentu, arguidu konfesa faktu sira hotu iha akuzasaun no hatutan katak iha Janeiru 2020, akontese tan diskute malu entre arguidu ho lezada kona-ba lezada lakohi atu ba natar. Ho nune'e, arguidu foti ai-naton ida no baku dala ida iha lezada nia isin sorin parte loos rezulta lezada monu ba rai. Problema ida ikus ne'e sira rezolve ona liuhusi família rua no to'o agora arguidu la baku ona lezada. Arguidu mós deklara katak arrepende ninia hahalok sira ne'e.

Enkuantu lezada konfirma faktu sira iha akuzasaun inklui konfirma ho arguidu nia deklarasaun katak iha Janeiru 2020, arguidu foti ai ne'ebé hodi tonka odamatán nian no baku dala ida iha lezada nia isin sorin parte loos halo lezada monu ba rai. Akontesimentu ida ne'e sira rezolve ona liuhusi dalam família nian, arguidu husu ona deskulpa ba lezada no to'o agora arguidu la halo ona agresaun hasoru lezada.

Alegasaun finál

Prokuradór haktuir katak arguidu konfesa faktu sira hotu iha akuzasaun no deklara tan katak iha Janeiru 2020 arguidu baku tan lezada, tanba ne'e mezmu sira di'ak malu ona maibé husu nafatin ba tribunál atu kondena arguidu tuir arguidu ninia hahalok.

Enkuantu defeza haktuir katak arguidu konfesa faktu hotu, koopera ho justisa, sira di'ak malu ona, arguidu arrepende ninia hahalok no to'o agora la baku ona lezada. Tanba ne'e, husu ba tribunál aplika pena ne'ebé adekuadu ba arguidu.

Desizaun

Depoisde avalia faktu hotu, tribunál prova katak iha 20 Novembru 2019, arguidu tuku dala lima iha lezada nia reen-toos, foti ai-dona no baku dala ida iha lezada nia ain kabun no basa dala iha oin parte karuk. Iha tinan 2017, arguidu tuku dala rua iha lezada kotuk laran no basa kanuruk. Iha tinan 2018 arguidu basa lezada iha parte inus to'o ran sai barak. Tribunál mós prova faktu foun katak iha fulan Janeiru 2020, arguidu baku dala ida iha lezada nia isin sorin parte loos. Bazeia ba faktu provadu sira ne'e no tetu

mós sirkunstánsia sira hotu, tribunál konklui no kondena arguidu ho pena prizaun tinan rua suspende ba tinan rua.

15. Krime obstrusaun ba autoridade Publiku

Nú. Prosesu	: 0065/14. LASIC
Kompozisaun Tribunál	: Koletivu
Juis	: Dr. José Gonçalves, Dra. Florencia Freitas no Dra. Jumiaty Freitas
Prokuradór	: Dr. Julio da Silva Correia
Defeza	: Dr. Grigório de Lima
Desizaun	: Absolve no pena prizaun tinan 3 suspende ba tinan 4

Iha 15 Outubru 2020, Tribunál Distritál Baukau liuhusi julgamentu movel iha Munisípiu Lautein prezide julgamentu leitura akordaun ba krime obstrusaun ba autoridade públiku ne'ebé envolve arguidu Johanes do Santos, Marcos do Santos, Oldérico Marques, Olandino da Costa, Eldegaro Jenacas Fernandes no Sergio da Costa (*editál*) hasoru lezadu nu'udar membru PNTL, iha Munisípiu Lautein.

Akuzasaun Prokuradór

Prokuradór akuza katak iha 24 Dezembru 2014, iha oras tuku 23:00 kalan, iha loja número I nia oin, polísia sira halo hela seguransa ba misa kalan natal nian. Arguidu sira uza fatuk no tuda polísia sira ne'e. Fatuk sira konsege kona ajente polísia Tito nia kotuk, hafoin polísia sira duni arguidu sira no konsege kaer aguidu sira no lori ba detein arguidu sira iha selo polísia.

Prokuradór akuza arguidu sira kontra artigu 243 KP kona-ba obstrusaun ba autoridade públiku ho moldura penál tinan 2 to'o tinan 8.

Produsaun ba prova sira

Iha julgamentu, arguidu Johanes do Santos konfesa katak nia tuda duni fatuk dala ida ba iha edifísiu polísia nian maibé la hatene kona ka lae tanba nia iha kondisaun lanu. Arguidu hatutan katak depoisde ne'e, arguidu hamutuk ho arguidu sira seluk ba tuur tiha iha loja oin no iha ne'ebá mak polísia sira ba kaer arguidu sira.

Arguidu Marcos do Santos deklara katak bainhira sira hemu hela tua iha loja oin, nia haree arguidu Johanes do Santos foti fatuk no tuda dala ida ba iha eskudra polísia nia kakuluk.

Arguidu Oldérico Marques deklara katak arguidu Johanes, Marcos no Sergio mak foti fatuk no tuda ba iha eskuadra polísia no bainhira rona tarutu sira mós halai. Arguidu

hatutan katak antes ne'e arguidu hasé ona arguidu na'in tolu ne'e atu la bele tuda tanba ta'uk polísia tiru fali sira maibé arguidu sira kontinua tuda.

Arguidu Olandino da Costa deklara katak momentu ne'e arguidu faan ikan besik edifísiu polísia no la hamutuk ho arguidu sira seluk maibé derrepente polísia ba kaer mós arguidu maski arguidu la hatene buat ida.

Arguidu Eldegario Jenacas Fernades deklara katak momentu ne'e nia hamutuk ho arguidu sira seluk hemu tua iha loja oin no haree nia kolega Johanes no Sergio mak tuda ba iha edifísiu polísia. Maski sira halai maibé polisia konsege kaer sira hotu. Arguidu hatutan katak arguidu Olandino da Costa la hamutuk ho sira iha loja oin.

Ekuantu arguidu Sergio da Costa editál tanba serbisu ona iha estranjeiru.

Entretantu testemuña Tito da Silva (membru PNTL) depoimenta katak momentu ne'e sira fó hela seguransa ba misa natal nian no derrepente arguidu sira tuda kalen tarutu no tuda kona mós testemuña nia kotuk laran maibé la hatene se mak tuda.

Alende ne'e, testemuña Sejinho José Silva da Costa (membru PNTL) mós depoimenta katak nia iha eskuadra laran no derrepente rona kalen tarutu. Testemuña sai ba liur no haree arguidu sira iha fatin akontesimentu, nune'e testemuña detein kedas arguidu sira.

Alegasaun finál

Prokuradór haktuir katak arguidu sira halo impedimentu ba polísia sira nia serbisu ne'ebé fó hela seguransa ba misa natal nian. Tanba ne'e, husu ba tribunál atu kondena arguidu sira ho pena prizaun tinan tolu suspende ba tinan haat.

Alende ne'e, defeza haktuir katak arguidu Johanes, Marcos no Sergio mak tuda tanba ne'e ba arguidu na'in tolu ne'e, husu ba tribunál atu aplika pena ne'ebé adekuadu, maibé ba arguidu Olderico Marques, Olandino da Costa, Eldegario Jenacas Fernades husu ba tribunál absolve sira husi prosesu ne'e.

Desizaun

Depoisde avalia faktu hotu, tribunál prova katak arguidu Johanes, Marcos no Sergio mak provadu komete krime obstrusaun ba autoridade públiku tanba impede polísia sira nia serbisu iha momentu ne'e. Bazeia ba prova ne'e no tetu sirkunstánsia sira hotu, tribunál kondena arguidu na'in tolu ho pena prizaun tinan tolu suspende ba tinan haat. Entretantu ba arguidu Olderico Marques, Olandino da Costa no Eldegario Jenacas Fernades, tribunál absolve husi prosesu ne'e.

16. Krime ofensa ba integridade física simples ho natureza violénsia doméstika

Nú. Prosesu	: 0008/19. BCLGA
Kompozisaun Tribunál	: Singulár
Juis	: Dra. José Gonçalves
Prokuradór	: Dr. Bartolomeu de Araújo
Defeza	: Dr. Antono Fernandes
Desizaun	: Pena prizaun fulan 6 suspende ba tinan 1

Iha 19 Outubtru 2020, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AdC hasoru nia feen, iha Munisípiu Baukau.

Akuzasaun Prokuradór

Prokuradór akuza katak hahú husi Agostu 2018, arguidu komesa la tau-matan ona ba lezada ho sira nia oan na'in lima tanba arguidu hola ona feto seluk.

Iha 02 Maiu 2019, oras tuku 16:00 lokraik, arguidu lori nia feen segundu ba iha lezada nia uma (lezada hela ho nia banin sir aka arguidu nia inan-aman). Ho nune'e, lezada bolu arguidu atu ko'alia tanbasá arguidu lori feto seluk maibé arguidu tolok lezada no tuku dala ida iha lezada nia ulun no buti lezada nian kakorok rezulta moras.

Prokuradór akuza arguidu kontra artigu 145 KP kona-ba krime ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun ne'ebé imputa ba nia no deklara arrepende ninia hahalok ne'e. Arguidu mós deklara katak depoisde akontesimentu agresaun ne'e, lezada ba hela tiha ho nia inan-aman sira durante fulan neen, foin fila ba sira nia uma. Maibé durante hela hamutuk mosu dezintendimentu entre feen na'in rua nune'e feen ki'ik halai tiha ba nia inan-aman sira. Arguidu hatutan katak nia konsege rezolve problema ne'e ho feen ki'ik maibé feen ki'ik nafatin hela ho nia inan-aman sira no arguidu hela ho lezada. Arguidu mós promete sei la halo tan krime hasoru lezada ka membru família sira iha futuru, iha oan hamutuk na'in hitu, nu'udar negosianto ki'ik ho rendimentu kada fulan US\$30.00.

Alende ne'e, lezada kontinua konfirma faktu sira iha akuzasaun no deklara katak depoisde akontesimentu lezada ba hela tiha ho inan-aman kuaze fulan neen mak fila ba sira nia uma. Lezada mós deklara katak sira di'ak malu ona no to'o agora arguidu la halo ona agresaun hasoru lezada.

Alegasaun finál

Prokuradór konsidera arguidu provadu komete krime hasoru lezada tuir faktu sira iha akuzasaun prokuradór nian. Tanba ne'e, mezmu sira di'ak malu ona husu atu nafatin kondena arguidu. Tetu ba sirkunstánsia sira hotu, husu ba tribunál atu kondena arguidu ho pena prizaun tinan ida suspende ba tinan rua.

Enkuantu defeza husu ba tribunál atu aplika pena ne'ebé justu no adekuadu ba arguidu tanba arguidu hatudu ona nia arrependimentu, di'ak malu ona ho lezada no perante tribunál arguidu promete iha futuru sei la halo tan agresaun hasoru membru família.

Desizaun

Depoisde avalia faktu sira hotu, tribunál prova katak arguidu tuku dala ida iha lezada nia ulun no buti lezada nia kakorok. Tribunál tetu mós sirkunstánsia atenuante sira hanesan arguidu konfesa, arrepende ona ninia hahalok, foin primeiravés mai hatan iha tribunál no di'ak malu ona ho lezada nune'e, tribunál kondena arguidu ho pena prizaun fulan neen suspende ba tinan ida.

17. Krime maus-tratus ba kónjuje

Nú. Prosesu	: 0006/20. VQWTL
Kompozisaun Tribunál	: Koletivu
Juis	: Dr. José António de Jesus Escurial da Silva Faria no Dr. José Gonçalves, Dr. Maria Modesta de Almeida Viera
Prokuradór	: Dr. Julio da Silva Correia
Defeza	: Dr. José Maria Caetano Guterres
Desizaun	: Pena prizaun tinan 2 suspende ba tinan 2

Iha 20 Outubru 2020, Tribunál Distritál Baukau prezide julgamentu leitura akordaun ba krime maus-tratus ba kónjuje ne'ebé envolve arguidu MP (kumpri hela prizaun preventiva) hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 05 Abril 2020, iha oras tuku 08:00 dadeer, arguidu tolok lezada no tuku dala ida iha kotuk laran. Antes agresaun ne'e, lezada husu iskeru ba sira nia oan atu tein oan nia sasoro maibé arguidu hanoin husu ba arguidu nune'e arguidu tolok no halo agresaun ne'e.

Iha loron tuir mai, 06 Abril 2020, iha oras tuku 10:00 dadeer, lezada kous hela sira nia oan ne'ebé foin fulan sia. Tanba sira nia oan ne'e tanis, lezada hatoba tiha iha kama leten no dehan ba sira nia oan ne'e atu nonook. Rona ne'e, arguidu tolok lezada no tuku dala barak iha lezada nia ulun parte loos no karuk halo lezada tanis tanba sente moras. Arguidu mós rasta lezada ba uma oin no tuku dala barak iha lezada nia hirus-

matan no riba lezada ba rai. Momentu lezada iha rai, arguidu uza ain sama lezada nia kakorok, dada lezada nia fuuk, tuku dala rua iha hirus-matan no tebe iha kotuk laran to'o lezada oin nakukun.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamento, arguidu konfesa faktu sira no deklara katak bainhira lezada oin nakukun arguidu kous lezada no lori ba hatoba tiha iha sira uma laran no la kleur polísia ba kaer arguidu no lori ba detein iha Eskuadra Polísia Uatulari. Arguidu mós deklara katak arguidu kumpri hela prizaun preventiva iha prizaun to'o agora. Arguidu hatutan katak lezada ho oan na'in rua ba vizita arguidu dala tolu ona no iha vizita ne'e arguidu tanis tanba abandona hela lezada no nia oan sira. Arguidu deklara liutan katak arrepende ona ninia hahalok no promete iha futuru sei la komete tan kualkér krime hasoru membru família ka ema seluk.

Alende ne'e, lezada kontinua konfirma faktu sira iha akuzasaun no deklara katak polísia sira mak lori lezada ba Sentru Saúde Uatulari no evakua lezada ba baixa durante loron haat iha Óspital Vikeke, kuaze fulan ida mak foin rekupera filafali. Lezada mós konfirma arguidu nia deklarasaun katak lezada ho oan na'in rua ba vizita arguidu dala tolu no durante vizita ne'e arguidu sempre tanis.

Alegasaun finál

Prokuradór haktuir katak arguidu komete hahalok ne'e ho vontade livre no ho intensaun hakarak atu halo tratamentu kruel hasoru lezada tanba maski lezada monu tun ona maibé arguidu kontinua halo agresaun hasoru lezada. Arguidu ninia hahalok ne'e halo lezada la confortavel. Tanba ne'e maski arguidu arrepende ona ninia hahalok no foin primeiravés mai hatan iha tribunál, husu ba tribunál atu kondena arguidu ho pena prizaun tinan rua suspende ba tinan haat.

Alende ne'e, defeza haktuir katak arguidu konfesa faktu hotu tuir akuzasaun, arguidu foin primeiravés mai hatan iha tribunál, arrepende ona ninia hahalok no di'ak malu ona ho lezada. Tanba ne'e, husu ba tribunál aplika pena ne'ebé adekuadu ba arguidu.

Desizaun

Depoisde avalia faktu sira, tribunál prova katak arguidu tolok lezada no tuku dala ida iha lezada nia kotuk laran. Tribunál mós prova iha loron tuir mai, arguidu tolok lezada, tuku dala barak iha lezada ulun parte loos no karuk, arguidu rasta lezada ba uma oin no tuku dala barak iha hirus-matan, riba ba rai, sama lezada nia kakorok, dada lezada nia fuuk, tuku dala rua iha hirus-matan no tebe kotuk laran to'o oin nakukun.

Bazeia ba prova sira ne'e no tetu mós sirkunstánsia atenuante sira hanesan arguidu konfesa, arrepende ona ninia hahalok, primeiravés mai hatan iha tribunál no di'ak malu ona ho lezada, nune'e tribunál kondena arguidu ho pena prizaun tinan rua suspende ba tinan rua.

18. Krime ofensa ba integridade física grave, arma brankas, ofensa ba integridade física simples no danu simples

Nú. Prosesu	: 0053/19. MNMNT
Kompozisaun Tribunál	: Koletivu
Juis	: Dra. Sribunana da Costa, Dra. Jumiaty Maria Freitas no Dr. José António de Jesus Escurial da Silva Faria
Prokuradór	: Dr. Ambrósio Rangel Freitas
Defeza	: Dr. José Maria Caetano Guterres
Desizaun	: Pena únika tinan 3 suspende ba tinan 3

Iha 20 Outubru 2020, Tribunál Distritál Baukau prezide julgamentu leitura akordaun ba krime ofensa ba integridade física grave, arma brankas, ofensa ba integridade física simples no danu simples ne'ebé envolve arguidu Raimundo Fatima Soares hasoru lezada Natalia Soares (arguidu nia feton) no Baltazar Seran (arguidu nia rian), iha Munisípiu Manatuto.

Akuzasaun Prokuradór

Prokuradór akuza katak iha 17 Agostu 2019, iha oras tuku 16:45 lokraik, arguidu tuku dala ida iha lezada nia tilun-hun parte karuk, tuku dala ida iha kabaas parte karuk, tebe dala ida iha kelen hun parte karuk. Tanba lezada ta'uk, lezada bolu nia oan sira iha uma laran atu sai tiha ba liur nune'e bele salva-an husi arguidu. Arguidu ho katana hakbesikan ba iha hariis fatin ne'ebé lezadu Baltazar Seran haris hela iha laran. Arguidu taa dala rua ba iha odamatan hariis fatin ne'e rezulta nakles. Lezadu sente ta'uk no satan-netik odamatan ho nia liman maibé arguidu kontinua taa tan dala rua rezulta lezadu nia liman laran kanek no ran sai barak. Hafoin lezadu hakilar husu ajuda nune'e Sr. JK mai no salva lezadu husi arguidu nia hahalok ne'e.

Antes agresaun ne'e, lezada iha hela dapur laran no oan sira haree hela televizaun iha uma laran. Arguidu tama ba uma laran atu baku labarik sira no labarik sira hakilar no nune'e lezada halai ba no ko'alia ba arguidu atu la bele baku labarik sira. Arguidu la simu no halo agresaun sira refere.

Prokuradór akuza arguidu kontra artigu 146 KP kona-ba ofensa ba integridade física grave ho moldural penál tinan 2 to'o tinan 8, artigu 145 KP kona-ba ofensa ba

integridade física simples ho moldural penál to'o tinan 3 ka multa, artigu 258 KP kona-ba danu simples ho moldura penal to'o tinan 3 ka multa, konjuga ho artigu 2 nú.1 (f) no 20 husi Lei Nú. 5/2017 kona-ba Lei Arma Brankas.

Antes tama ba produsaun ba prova sira, bazeia ba artigu 262 KPP kona-ba tentativa konsiliaisaun, tribunál halo tentativa konsiliaisaun ba arguidu ho lezadu sira tanba krime ofensa ba integridade física simples no danu simples ne'e klasifika nu'udar krime semi-públiko no nia prosedimentu depende ba keixa.

Iha prosesu konsiliaisaun ne'e, lezadu no lezada hakarak deziste tiha sira nia keixa hasoru arguidu tanba antes ne'e sira rezolve ona problema ne'e tuir tradisaun Timor nian. Iha rezolve problema ne'e, arguidu nu'udar umane husu ona deskulpa ba lezadu no fó ona osan US\$100.00 no tais ida. Bazeia ba konkordánsia husi parte sira ne'e, tribunál omologa tiha pedidu dezisténsia ne'e. Entretantu tribunál kontinua halo prosesu julgamentu ba krime ofensa ba integridade física grave no arma brankas hasoru arguidu.

Produsaun ba prova sira

Iha julgamentu, arguidu deklara katak iha momentu ne'e arguidu lanu todan no la hatene-an nune'e la hatene oinsa mak nia taa tiha lezadu nia liman tanba sira laiha problema. Arguidu mós deklara katak nia foin hatene bainhira oin moos. Depoisde akontesimentu ne'e, sira rezolve problema ne'e perante família, arguidu husu ona deskulpa ba lezada nu'udar nia feton rasik no lezadu nu'udar nia rian rasik, arguidu mós fó osan ba lezada US\$100.00 no tais ida. Arguidu deklara katak arrepende ninia hahalok ne'e, foin primeiravés mai hatan iha tribunál no hanesan motorista baskolante kada fulan hetan osan US\$200.00.

Enkuantu lezadu deklara katak momentu ne'e nia iha haris fatin no derrepente kalen odataman haris fatin tarutu dala rua. Tanba ne'e, lezadu satan-netik odamaton ne'e ho nia liman loos maibé bainhira arguidu taa tan dala ida, katana refere kona iha lezadu nia liman laran parte karuk, hafoin lezadu hakilar no Sr. JK mai ajuda no salva lezadu. Alende ne'e, lezadu mós konfirma arguidu nia deklarasaun katak sira di'ak malu ona.

Alegasaun finál

Prokuradór konsidera arguidu provadu komete krime tuir faktu sira iha akuzasaun no argumenta mós katak la'os tanba lanu bele halo violénsia hasoru ema sira ne'ebé la hatene buat ida. Tanba ne'e, mezmu sira di'ak malu ona, husu ba tribunál atu kondena arguidu ho pena únika tinan tolu suspende ba tinan tolu.

Enkuantu defeza husu ba tribunál atu fó justisa ne'ebé justu ba arguidu ho konsiderasaun sira ba iha arguidu nia konfisaun, arependimentu, rezolve ona problema

ne'e tuir tradisaun Timor nian, foin primeiravés mai hatan iha tribunál no koopera ho justisa nune'e la difikulta tribunál nia prosesu.

Desizaun

Depoisde avalia faktu sira hotu, tribunál prova katak arguidu ho katana taa dala rua iha odamatan haris fatin nian no bainhira taa ba dala tolu kona mós lezadu nia liman laran. Tribunál mós tetu sirkunstánsia atenuante sira hanesan arguidu konfesa, arrepende ona ninia hahalok, foim primeiravés mai hatan iha tribunál no di'ak malu ona ho lezadu. Tanba ne'e, tribunál kondena arguidu ba krime ofensa ba integridade fízika grave ho pena prizaun tinan rua no ba krime arma brankas tribunál kondena arguidu ho pena prizaun tinan tolu. Husi pena ba krime ne'e, tribunál halo akumulasaun jurídiku no kondena arguidu ho pena únika tinan tolu suspende ba tinan tolu.

19. Krime ofensa ba integridade fízika simples ho natureza violénsia doméstika

Nú. Prosesu	: 0020/19. BCSIC
Kompozisaun Tribunál	: Singulár
Juis	: Dra. Florencia Freitas
Prokuradór	: Dr. Ambrósio Rangel Freitas
Defeza	: Dr. Grigório de Lima
Desizaun	: Pena multa US\$30.00

Iha 21 Outubru 2020, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé involve arguidu SS hasoru nia feen, iha Munisípiu Baukau.

Akuzasaun prokuradór

Prokuradór akuza katak iha 03 Janeiru 2019, iha oras tuku 20:30 kalan, lezada haruka mensajen ba mane seluk liuhusi *facebook*. Ho nune'e, arguidu hirus no foti ai-kakeu rohan naton ida no baku dala ida iha lezada nia liman karuk no baku dala ida ain kabun parte karuk.

Prokuradór akuza arguidu kontra artigu 145 KP kona-ba krime ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklara katak dezde forma família iha tinan 2014 no iha ona oan na'in rua arguidu foim halo agresaun hasoru lezada. Arguidu deklara liutan katak lezada ba hela tiha iha uma mahon no bainhira fila husi uma mahon sira di'ak malu to'o agora. Arguidu hatutan katak

arrepende ninia hahalok, foin primeiravés mai hatan iha tribunál, serbisu kazuál iha Diresaun Saneamentu iha Baukau Vila ho rendimentu kada fulan US\$90.00.

Alende ne'e, lezada kontinua konfirma faktu sira iha akuzasaun inklui konfirma arguidu nia deklarasau katak lezada hela tiha iha uma mahon no bainhira fila husi uma mahon, sira di'ak malu to'o agora.

Alegasaun finál

Prokuradór haktuir katak problema entre feen-la'en tuir loloos buka dala seluk hodi rezolve la'os uza violénsia. Alende ne'e, konsidera katak arguidu ninia hahalok ne'e halo ho livre no intensaun hakarak halo agresaun hasoru lezada. Bazeia ba konsiderasaun sira ne'e, husu ba tribunál atu kondena arguidu ho pena multa US\$ 30.00.

Enkuantu defeza husu tribunál atu konsidera arguidu nia konfisaun, arguidu nia arrependimentu no foin primeiravés mai hatan iha tribunál. Bazeia ba sirkunstánsia ne'e, husu ba tribunál aplika pena ne'ebé adekuadu ba arguidu.

Desizaun

Depoisde avalia faktu hotu, tribunál prova katak arguidu foti ai-kakeu naton ida no baku dala ida iha lezada nia liman karuk no baku dala ida ain kabun parte karuk. Bazeia ba faktu provadu sira ne'e no tetu mós sirkunstánsia sira hotu, tribunál kondena arguidu ho pena multa US\$30.00 ne'ebé arguidu sei selu kada Ioron US\$0.50 durante Ioron 60. Bainira arguidu la selu pena multa ne'e, arguidu sei kumpri iha prizaun durante Ioron 25 nu'udar pena alternativa.

20. Krime ofensa ba integridade física simples ho natureza violénsia doméstika no krime ameasa

Nú. Prosesu	: 0024/20. BCBCV
Kompozisaun Tribunál	: Singulár
Juis	: Dr. José Quintão Soares Celestino
Prokuradór	: Dr. João Marques
Defeza	: Dr. José Maria Caetano Guterres
Desizaun	: Pena prizaun fulan 8 suspende ba tinan 1

Iha 26 Outubru 2020, Tribunál Distritál Baukau prezide julgamentu leitura sentesa ba krime ofensa ba integridade física simples ho natureza violénsia doméstika no krime ameasa ne'ebé envolve arguidu JdC hasoru nia feen, iha Munisípiu Baukau.

Akuzasaun Prokuradór

Prokuradór akuza katak 23 Marsu 2020, iha oras tuku 10:30 dadeer, arguidu tuku dala ida iha lezada nia tilun-hun parte loos, tuku dala ida iha hasan parte loos, tuku dala ida iha hirus-matan parte karuk, tuku dala ida iha kanuruk, tuku dala ida iha kabun, tebe dala ida iha kotuk laran no dala ida iha kanotak. Antes ne'e, arguidu ho lezada diskute malu kona-ba oan sira ne'ebé lezada abandona mesak hela iha uma. Arguidu mós ameasa lezada dehan "ó ba ó nia inan-aman se lae hau taa mate tiha ó".

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD no kontra artigu 157 KP kona ba krime ameasa ho moldural penál to'o tinan 1 ka multa.

Antes tama ba produsaun ba prova sira, bazeia ba artigu 262 KPP kona-ba tentativa konsiliaсаun, tribunál halo tentativa konsiliaсаun ba arguidu relasiona ho krime ameasa tanba kazu ne'e klasifikasi nu'udar krime semi-públiko no nia prosedimentu depende ba keixa.

Iha prosesu konsiliaсаun ne'e, perante tribunál lezada hakarak deziste tiha nia keixa hasoru arguidu. Bazeia ba konkordánsia husi parte rua ne'e, tribunál omologa keixa ne'e. Entretantu ba krime ofensa ba integridade física simples ho natureza violénsia doméstika hasoru arguidu, tribunál kontinua halo prosesu julgamentu.

Produsaun ba prova sira

Iha julgamentu, arguidu konfesa faktu hotu iha akuzasaun no deklara katak arrepende ninia hahalok. Liutan arguidu deklara katak lezada ho oan na'in haat ba hela tiha iha nia inan-aman to'o agora. Arguidu tenta atu ba haree lezada ho nia oan sira maibé arguidu ta'uk tanba tuir informasaun husi lezada katak nia maun sira sei baku arguidu bainhira arguidu ba iha ne'ebá. Arguidu mós deklara katak perante tribunál sira di'ak malu ona, primeiravés mai hatan iha tribunál moris hamutuk fali ho lezada no nia oan sira. Arguidu hatutan mós katak foin no nu'udar agrikultór rendimentu hodi sustenta de'it família.

Alende ne'e, lezada kontinua konfirma faktu sira iha akuzasaun inklui arguidu nia deklarasaun katak lezada ho oan sira ba hela iha nia inan aman nia uma maibé lezada prontu simu fali arguidu nu'udar nia la'en no aman ba oan sira.

Alegasaun finál

Prokuradór haktuir katak arguidu nia hahalok ne'e prense duni rekezitu sira husi krime ne'ebé imputa ba nia no arguidu nia hahalok ne'e halo lezada sente moe no sente moras grave nune'e lezada deside ho nia oan sira ba hela tiha ho nia inan-aman sira. Alende ne'e, perante tribunál arguidu ho lezada di'ak malu no simu malu fali nu'udar feen-la'en no ida ne'e klaru katak sira sei moris hamutuk ba oin. Tanba ne'e, atu

prevene arguidu ninia hahalok ne'e iha futuru, husu ba tribunál atu kondena arguidu ho pena prizaun fulan ualu suspende ba tinan ida.

Alende ne'e, defeza haktuir katak arguidu konfesa integralmente ba faktu sira, foin primeiravés baku lezada, arrepende ona ninia hahalok no hela ketak tiha ho arguidu maibé perante tribunál arguidu no lezada di'ak malu fali no deside moris hamutuk filafali. Tanba ne'e, husu ba tribunál atu aplika pena ne'ebé adekuadu ba arguidu.

Desizaun

Depoisde avalia faktu sira hotu, tribunál prova katak arguidu tuku dala ida iha lezada nia tilun-hun parte loos, tuku dala ida iha hasan parte loos, tuku dala ida iha hirus-matan parte loos no tuku dala ida iha kanuruk. Tribunál mós prova katak arguidu tuku dala ida iha lezada nia kabun, tebe dala ida iha kotuk laran no tebe dala ida iha kanotak. Bazeia ba prova sira ne'e no tetu sirkunstânsia sira hotu, tribunál konklui prosesu ne'e no kondena arguidu ho pena prizaun fulan ualu suspende ba tinan ida.

21. Krime ofensa ba integridade física simples ho natureza violénsia doméstika

Nú. Prosesu	: 0072/20. BCBCV
Kompozisaun Tribunál	: Singulár
Juis	: Dr. José Quintão Soares Celestino
Prokuradór	: Dr. João Marques
Defeza	: Dr. José Maria Caetano Guterres
Desizaun	: Pena prizaun fulan 6 suspende ba tinan 1

Iha 26 Outubru 2020, Tribunál Distritál Baukau prezide julgamento leitura sentensa ba krime ofensa ba integridade física simples ho natureza violénsia doméstika ne'ebé envolve arguidu ABC hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 23 Juñu 2020, iha oras tuku 15:00 lokraik, arguidu ho kondisaun lanu, husu nia *simcard* ba lezada maibé lezada dehan katak nia la hatene arguidu nia *simcard*. Ho nune'e arguidu basa dala ida iha lezada nia hasan parte loos no liman kukun kona iha lezada nia hasan resulta kanek no ran. Arguidu tama ba uma laran no soe lekar lezada nia roupa iha kama laran, iha meja leten no balun soe iha rai.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu deklara katak momentu ne'e arguidu lanu no sira diskute malu kona-ba *simcard* no tanba la intende malu arguidu basa dala ida iha lezada nia hasan no liman kukun kona duni hasan no kanek. Arguidu mós deklara katak arrepende ninia hahalok, foin primeiravés mai hatan iha tribunál, di'ak malu ona no to'o agora arguidu la baku ona lezada.

Alende ne'e, lezada mós kontinua konfirma faktu sira iha akuzasaun no deklara mós katak sira di'ak malu ona to'o agora.

Alegasaun finál

Prokuradór haktuir katak arguidu provadu komete krime hasoru lezada. Alende ne'e, Tribunál Distritál Baukau kuaze lor-loron halo julgamentu ba krime ho natureza violénsia doméstika no kondena ona arguidu barak ona maibé krime ne'e aumenta beibeik. Bazeia ba konsiderasaun ne'e, husu ba tribunál atu kondena arguidu ho pena prizaun fulan tolu suspende ba tinan ida.

Enkuantu, defeza husu ba tribunál atu aplika pena ne'ebé adekuadu ba arguidu tanba arguidu konfesa ninia hahalok, foin primeiravés mai hatan iha tribunál, arrepende ona ninia hahalok no di'ak malu ona ho lezada.

Desizaun

Depoide avalia faktu sira ne'ebé prodús durante julgamentu, tribunál prova katak arguidu basa dala ida iha lezada nia hasan parte loos no arguidu liman kukun kona iha lezada nia hasan halo kanek. Bazeia ba prova ne'e no tetu mós ba sirkunstânsia atenuante sira hanesan arguidu arrepende ona ninia hahalok, foin primeiravés mai hatan iha tribunál no nu'udar ema ne'ebé mak iha responsabilidade hodi sustenta família, nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

22. Krime ofensa ba integridade física simples ho naturéza violensia doméstika

Nú. Prosesu	: 0042/20. BCBCV
Kompozisaun Tribunál	: Singulár
Juis	: Dr. José Quintão Soares Celestino
Prokuradór	: Dr. João Marques
Defeza	: Dr. Jose Maria Caetano Guterres
Desizaun	: Pena prizaun fulan 10 suspende ba tinan 1

Iha 27 Outubru 2020, Tribunál Distritál Baukau prezide julgamentu leitura sentesa ba krime ofensa ba integridade física simples ho natureza violénsia doméstika ne'ebé envolve arguidu ZAG hasoru nia feen, iha Munisípiu Baukau.

Akuzasaun Prokuradór

Prokuradór akuza katak 21 Novembru 2019, iha oras tuku 07:00 dadeer, arguidu tuku dala rua iha lezada nia ulun parte kotuk no foti besi naton ida no baku dala ida iha lezada nia kotuk laran. Antes agresaun ne'e, lezada ba kuru bee no fila kleur.

Prokuradór akuza arguidu kontra artigu 145 KP kona-ba krime ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no deklara katak arguidu halo agresaun ne'e tanba sira nia oan ne'ebé sei kikoan tanis makaas no lezada fila kleur husi kuru bee. Arguidu mós deklara katak desde sira forma família iha tinan 2015 no iha ona na'in rua foin primeiravés mai hatan iha tribunál. Arguidu mós deklara katak arrepende ona ninia hahalok, di'ak malu ona ho lezada no nu'udar agrikultór rendimentu uza de'it ba iha nesesidade família.

Alende ne'e, lezada konfirma faktu sira iha akuzasaun inklui konfirma mós arguidu nia deklarasau katak sira di'ak malu ona to'o agora no arguidu foin ba dala primeiru halo agresaun hasoru lezada.

Alegasaun finál

Prokuradór haktuir katak arguidu nia konduta ne'e prense rekezitu sira husi krime ne'ebé imputa ba nia. Alende ne'e, tuir loloos arguidu tenke pasiensia haree sira nia oan tanba lezada mós halo hela serbisu seluk. Ho nune'e, mezmu sira di'ak malu ona, husu ba tribunál atu kondena arguidu ho pena prizaun fulan ida suspende ba tinan ida nu'udar prevensaun ida ba arguidu atu la repete ninia hahalok ne'e iha futuru.

Enkuantu, defeza haktuir katak arguidu konfesa integralmente ba faktu sira, di'ak malu ona ho lezada, arrepende ninia hahalok no foin primeiravés mai hatan iha tribunál. Tanba ne'e, husu ba tribunál atu aplika pena ne'ebé adekuadu ba arguidu.

Desizaun

Depoide avalia faktu sira ne'ebé prodús durante julgamentu, tribunál prova katak arguidu tuku dala rua iha lezada nia ulun parte kotuk no uza besi baku dala ida iha lezada nia kotuk laran. Bazeia ba prova sira ne'e no tetu mós sirkunstánsia sira hotu, tribunál konklui prosesu ne'e no kondena arguidu ho pena prizaun fulan 10 suspende ba tinan ida.

23. Krime ofensa ba integridade física simples ho natureza violénsia doméstika

Nú. Prosesu	: 0011/19. LALRO
Kompozisaun Tribunál	: Singulár
Juis	: Dra. Jumiaty Freitas
Prokuradór	: Dr. Julio da Silva Correia
Defeza	: Dr. Germano G. Ramos
Desizaun	: Pena prizaun tinan 1 fulan 6 suspende ba tinan 2

Iha 28 Outubru 2020, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu DdS hasoru nia feen, iha Munisípiu Lautein.

Akuzasaun Prokuradór

Prokuradór akuza katak iha 18 Julu 2019, iha oras tuku 06:30 dadeer, lezada hader mai no nono hela bee manas atu tau ba termo. Hafoin ne'e, lezada haruka arguidu atu daan kumbili maibé arguidu haruka fali lezada mak daan inklui haruka lezada atu haree sira nia kumbili iha ai-leton tanba arguidu atu ko'a naan kuda. Arguidu bolu lezada maibé lezada la hatan tanba lezada mós haree no preokupa hela ho sira nia oan ne'ebé atu toba. Ho nune'e, arguidu tama ba uma laran no tebe dala ida iha lezada nia ain tuur parte loos. Depoisde ne'e, bainhira lezada fase hela roupa, lezada rona sira oan tanis ho nune'e lezada hakilar no tolok sira nia oan ne'e maibé arguidu hanoin katak lezada tolok arguidu. Ho nune'e arguidu buti lezada nia kakorok, riba ba rai halo lezada nia tilun-hun kona iha rai resulta kanek no ran.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklara katak desde forma família iha tinan 2018 no iha ona oan na'in lima arguidu foin mak halo agresaun hasoru lezada. Arguidu deklara liutan katak di'ak malu fali ona ho lezada, arrepende ninia hahalok ne'e, promete ba futuru sei la baku tan lezada no nu'udar agrikultór nia rendimentu hodi sustenta deit família.

Entertantu lezada mós kontinua konfirma faktu sira iha akuzasaun, di'ak malu ona ho arguidu no to'o agora arguidu la baku tan lezada.

Alegasaun finál

Prokuradór haktuir katak arguidu konfesa faktu sira iha akuzasaun no lezada mós konfirma faktu sira ne'e. Tanba ne'e, mezmu sira di'ak malu ona maibé atu prevene

arguidu ninia hahalok violentu iha futuru, husu ba tribunál kondena arguidu ho pena prizaun tinan rua suspende ba tinan rua.

Enkuantu defeza argumenta atu tribunál konsidera arguidu nia konfisaun, foin primeiravés baku lezada, arrepende ona ninia hahalok no di'ak malu ona ho lezada. Tanba ne'e, husu ba tribunál atu aplika pena ne'ebé adekuadu ba arguidu.

Desizaun

Depoisde avalia faktu hotu, tribunál prova katak arguidu tebe dala ida iha lezada nia ain-tuur parte loos, buti lezada nia kakorok, riba lezada ba rai. Bazeia ba faktu provadu sira no tetu mós sirkunstânsia sira hotu, tribunál kondena arguidu ho pena prizaun tinan ida fulan neen suspende ba tinan rua no aplika regra ba konduta atu arguidu apresenta-an periodikamente kada fulan durante fulan neen ba iha tribunál.

24. Krime ofensa ba integridade física simples ho natureza violénsia doméstika

Nú. Prosesu	: 0033/20. BCBCV
Kompozisaun Tribunál	: Singulár
Juis	: Dra. Maria Modesta de Almeida Viera
Prokuradór	: Dr. Bartolomeu de Araújo
Defeza	: Dr. Antonio Fernandes
Desizaun	: Pena prizaun fulan 3 suspende ba tinan 1

Iha 29 Outubru 2020, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu MAB hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 10 Abril 2020, iha oras tuku 23:30 kalan, lezada fanu arguidu atu ko'alia kona-ba sira nia kreditu iha Banku BNCTL, maibé arguidu tebe dala ida kona iha lezada nia kabun parte karuk. Antes ne'e sira iha ona problema kona-ba saláriu ne'ebé arguidu simu iha Dili maibé lakon hotu.

Prokuradór akuza arguidu kontra artigu 145 KP kona-ba krime ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu nega halo agresaun hasoru lezada no deklara katak arguidu ba simu saláriu iha Dili no bainhira fila husi Dili to'o uma, arguidu ba fali haree televizaun iha arguidu nia maun nia uma. Fila husi ne'ebá lezada husu kona-ba arguidu nia

saláriu, maibé arguidu hatan hatan katak osan sira ne'e, lakon hotu iha bis laran. Husi ne'e, sira diskute malu. Arguidu deklara liutan katak iha loron tuir mai, lezada kontakta nia família sira hodi mai rezolve sira nia problema ne'e maibé laiha solusaun nune'e lezada foti sasan ho labarik sira ba hotu nia inan-aman sira. Arguidu hatutan foin primeiravés mai hatan iha tribunál, nu'udar funsionáriu iha kampu aviasaun Baukau ho saláriu kada fulan US\$350.00.

Enkuantu lezada kontinua konfirma faktu sira iha akuzasaun no deklara katak depoisde akontese lezada ho labarik na'in neen ba hela tiha ho nia inan-aman no to'o agora arguidu la tau-matan ona ba lezada ho sira nia oan sira. Lezada mós deklara katak durante moris hamutuk arguidu foin primeiravés halo agresaun hasoru nia.

Alegasaun finál

Prokuradór haktur katak arguidu nega faktu ne'ebé imputa ba nia maibé lezada mantein faktu sira iha akuzasaun. Ho nune'e, arguidu provadu halo duni agresaun fíziku hasoru lezada hodi fo impaktu lezada trauma no to'o agora sira moris separa. Bazeia ba konsiderasun sira ne'e, husu ba tribunál atu kondena arguidu ho pena prizaun fulan tolu suspende ba tinan ida.

Enkuantu, defeza haktur katak arguidu nega faktu sira no foin primeiravés mai hatan iha tribunál. Tanba ne'e, husu ba tribunál atu aplika pena ne'ebé adekuadu ba arguidu.

Desizaun

Depoisde avalia faktu hotu, tribunál prova katak arguidu tebe dala ida iha lezada nia kabun parte karuk. Bazeia ba faktu provadu sira no tetu mós sirkunstânsia sira hotu, tribunál kondena arguidu ho pena prizaun fulan tolu suspende ba tinan ida.

25. Krime ofensa ba integridade fízika simples ho natureza violénsia doméstika no krime ameasa

Nú. Prosesu	: 0023/20. VQVQQ
Kompozisaun Tribunál	: Singulár
Juis	: Dr. Sribuana da Costa
Prokuradór	: Dr. Julio da Silva Correia
Defeza	: Dr. Germano G. Ramos
Desizaun	: Omologa no pena prizaun tinan 1 suspende ba tinan 2

Iha 29 Outubru 2020, Tribunál Distritál Baukau prezide julgamentu leitura sentesa ba krime ofensa ba integridade fízika simples ho natureza violénsia doméstika no krime ameasa ne'ebé envolve arguidu JJM hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 19 Marsu 2020, iha oras tuku 07:30 dadeer, arguidu haruka lezada te'in sasoro maibé tanba lezada ko'us hela sira nia oan nune'e lezada la te'in. Ho nune'e, arguidu soe tiha sanan ne'ebé hatuur hela iha ahi-matan, tuku dala rua iha lezada nia kabaas parte loos, tuku dala rua iha ulun, buti lezada nia kakorok, foti ai baku dala ida iha lezada nia liman parte loos no ameasa atu tara lezada.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD no kontra artigu 157 KP kona-ba ameasa ho moldural penál to'o tinan 1 ka multa.

Antes tama ba produsaun ba prova sira, bazeia ba artigu 262 KPP kona-ba tentativa konsiliaisaun, tribunál halo tentativa konsiliaisaun ba arguidu no lezada ba iha krime ameasa tanba krime ne'e klasifika nu'udar krime semi-públiko no nia prosedimentu depende ba keixa.

Iha prosesu konsiliaisaun ne'e, arguidu ho lezada konkorda atu deziste tiha keixa ne'e tanba antes ne'e sira rezolve ona problema ne'e tuir tradisaun. Bazeia ba konkordánsia husi parte rua ne'e, tribunál omologa keixa ne'e. Entretantu ba krime ofensa ba integridade física simples (VD), tribunál kontinua halo prosesu julgamentu.

Produsaun ba prova sira

Iha julgamentu, arguidu konfesa faktu sira iha akuzasaun no deklara katak iha momentu ne'e arguidu fila husi to'os no sente hamlaha loos maibé lezada seidauk prepara hahan ruma. Arguidu mós deklara katak bainhira nia fila husi sela polisia sira di'ak malu fali. Arguidu hatutan katak arrepende ninia hahalok, foin primeiravés mai hatan iha tribunál no nu'udar agrikultór ho rendimentu hodi sustenta de'it família.

Alende ne'e, lezada kontinua konfirma faktu sira iha akuzasaun inklui konfirma arguidu nia deklarasau katak sira di'ak malu ona to'o agora.

Alegasaun finál

Prokuradór haktuir katak arguidu nia hahalok violentu ne'e prense krime ne'ebé imputa ba nia no maski arguidu halo serbisu iha to'os maibé lezada mós haree labarik sira ho responsabilidade la'os lezada mak tenke prepara buat hotu. Tanba ne'e, atu prevene arguidu ninia hahalok ne'e iha futuru tanba sira sei moris hamutuk ba tinan naruk, husu ba tribunál atu kondena arguidu ho pena prizaun tinan rua suspende ba tinan rua.

Enkuantu ne'e, defeza haktuir katak arguidu konfesa integralmente ba faktu sira iha akuzasaun, di'ak malu to'o agora, arrepende ninia hahalok ne'e no foin primeiravés mai

hatan iha tribunál, tanba ne'e husu ba tribunál atu aplika pena ne'ebé adekuadu ba arguidu.

Desizaun

Depoide avalia faktu sira hotu, tribunál prova katak arguidu tuku dala rua iha lezada nia kabaas parte loos, tuku dala rua iha ulun, buti lezada nia kakorok, foti ai baku dala ida iha lezada nia liman parte loos. Bazeia ba prova sira ne'e no tetu mós sirkunstânsia sira hotu, tribunál konklui prosesu ne'e no kondena arguidu ho pena prizaun tinan ida suspende ba tinan rua.

26. Krime ofensa ba integridade física simples ho natureza violénsia doméstika

Nú. Prosesu	: 0032/19. VQWCB
Kompozisaun Tribunál	: Singulár
Juis	: Dr. Sribuana da Costa
Prokuradór	: Dr. Julio da Silva Correia
Defeza	: Dr. Germano G. Ramos
Dezisaun	: Pena prizaun fulan 6 suspende ba tinan 1

Iha 29 Outubru 2020, Tribunál Distritál Baukau prezide julgamento leitura sentensa ba krime ofensa ba integridade física simples ho natureza violénsia doméstika ne'ebé envolve arguidu JGM hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 24 Dezembru 2019, iha oras tuku 08:00 dadeer, arguidu rasta lezada nia fuuk, basa dala rua iha hasan, tuku dala haat iha kotuk laran to'o lezada monu ba rai no bainhira lezada iha rai ne'e arguidu sama tan lezada. Antes agresaun, arguidu la hatan atu lezada ba iha lezada nia inan-aman nia uma.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamento, arguidu konfesa faktu hotu iha akuzasaun no deklara katak di'ak malu ona ho lezada. Arguidu mós deklara katak desde forma família iha tinan 2019 foin primeiravés halo agresaun hasoru lezada, arrepende ninia hahalok ne'e no promete ba futuru sei la baku tan lezada. Arguidu hatutan katak nu'udar agrikultór ho rendimentu ne'ebé sustenta de'it família.

Alende ne'e, lezada mós kontinua konfirma faktu sira iha akuzasaun no deklara katak sira di'ak malu ona no to'o agora arguidu la baku ona lezada.

Alegasaun finál

Prokuradór haktur katak arguidu provadu komete krime hasoru lezada tanba ne'e mezmu sira di'ak malu ona maibé atu halo prevensaun ba arguidu atu la komete tan ninia hahalok ne'e iha futuru, husu ba tribunál kondena arguidu ho pena prizaun tinan ida suspende ba tinan ida.

Entretantu defeza husu ba tribunál aplika pena admoestasaun ba arguidu ho konsiderasaun katak arguidu konfesa faktu sira, di'ak malu ona ho lezada, arrepende ninia hahalok no foin primeiravés mai hatan iha tribunál.

Desizaun

Depoisde avalia faktu sira ne'ebé prodús durante julgamentu, tribunál prova katak arguidu rasta lezada nia fuuk, basa dala rua iha hasan, tuku dala haat iha kotuk laran to'o monu ba rai no arguidu sama lezada. Tribunál mós tetu sirkunstânsia atenuante sira hanesan arguidu konfesa, arrepende ninia hahalok, di'ak malu ona ho lezada, foin primeiravés mai hatan iha tribunál no nu'udar ema ne'ebé mak iha responsabilidade hodi sustenta família, nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

27. Krime omisídui agravadu ho natureza violénsia doméstika no arma brankas

Nú. Prosesu	: 0089/19. BCSIC
Kompozisaun Tribunál	: Singular
Juis	: Dr. José Quintão Soares Celestino, Dra. Jumiaty Freitas no Dra Maria Modesta de Almeida Viera
Prokuradór	: Dr. Bartolomeu de Araújo
Defeza	: Dr. Antonio Fernandes
Desizaun	: Pena prizaun tinan 15

Iha 30 Outubru 2020, Tribunál Distritál Baukau prezide julgamentu leitura akordaun ba krime omisídui agravadu ho natureza violénsia doméstika no arma brankas ne'ebé envolve arguidu JVX hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 17 Dezembru 2019, iha oras tuku 11:00 dadeer, lezada iha hela dapur laran hamutuk ho arguidu nia feton (FC). Arguidu ba ba dapur laran no dada lezada ba uma laran no dulas lezada nia liman. Haree ne'e, FC halai ba sori netik tiha. Maibé arguidu liki nia-an halo lezada ho FC monu hotu ba rai. Lezada hader husi rai no atu halai, arguidu lori tudik no sona iha lezada nia susun okos parte loos no sona iha

knosen parte karuk. Depoisde agresaun ne'e, arguidu soe sa'e tiha tudik ba uma leten no halai ba entrega-an iha Eskuadra Polísia Baukau Vila.

Prokuradór akuza arguidu kontra artigu 139 KP kona-ba omisídui agravadu ho moldura penál husi tinan 12 to'o tinan 25 prizaun, konjuga ho artigu 2, 3(a), 35(b) no 36 LKVD no kontra artigu 2 nú.1 (f) no 20 husi Lei Nú. 5/2017 kona-ba Lei Arma Brankas.

Produsaun ba prova sira

Iha prosesu julgamentu, arguidu hili direitu atu la ko'alia ka nonook.

Testemuña FC nu'udar arguidu nia feton depoimenta katak momentu ne'e lezada ho testemuña iha hela dapur laran no arguidu mosu husi uma laran mai no kaer lezada nia kabaas rua no dudu lezada ba uma laran. Haree ne'e, testemuña hateten ba arguidu atu la bele dada lezada hanesan ne'e. La kleur testemuña rona lezada hakilar iha uma laran. Testemuña halai ba no haree arguidu aperta hela lezada nia kakorok no haree mós lezada kaer hela nia kanek. Testemuña hatutan katak nia consege hasai arguidu nia liman husi lezada nia kakorok hafoin arguidu halai ba estrada no lezada mós halai tuir ba liur no monu iha ai-tali huun. Testemuña ba ko'us no fó hatene família sira ajuda lori lezada ba Ospitál Regionál maibé la to'o oras ida lezada hakotu nia iis.

Alegasaun finál

Prokuradór haktuir katak iha jugamentu arguidu hili direitu nonook maibé testemuña fó nia depoimentu liuhusi juramentu katak sira na'in tolu mesak iha momentu ne'e no lezada nia mate ne'e tanba arguidu nia hahalok no agrava liutan tanba lezada nu'udar arguidu nia feen. Tanba ne'e, husu ba tribunál atu kondena arguidu ho pena única tinan 20 iha prizaun tanba arguidu ninia hahalok ne'e prense krime ne'ebé imputa ba nia no arguidu komete krime ne'e ho forma livre no ho konsiénsia rasik.

Enkuantu, defeza haktuir katak mezmu arguidu hili direitu nonook maibé bazeia ba produsaun ba prova sira, arguidu iha oan na'in neen ne'ebé presiza mós arguidu atu tau-matan. Tanba ne'e, husu ba tribunál fó justisa ne'ebé justu no adekuadu ba arguidu.

Dezisaun

Depoide avalia faktu sira ne'ebé prodús durante julgamentu, tribunál prova katak arguidu dada lezada husi dapur ba uma laran no dulas lezada nia liman. Testemuña ba sori maibé arguidu liki-an halo lezada ho testemuña monu hotu ba rai. Tribunál mós prova katak bainhira lezada hadeer atu halai, arguidu lori tudik sona iha lezada nia susun okos parte loos no sona iha knosen parte karuk no tudik refere arguidu soe tiha ba iha uma leten. Tribunál mós tetu sirkunstánsia atenuante sira hanesan arguidu foin

primeiravés mai hatan iha tribunál no nu'udar ema ne'ebé mak iha responsabilidade hodi sustenta famíília, nune'e tribunál konklui prosesu ne'e no kondena arguidu ho pena únika tinan 15 iha prizaun.

Atu hetan informasaun liutan favór kontaktu:

Ana Paula Marçal
Diretora Ezekutiva JSMP
Telefone: 3323883/77040735
Email: ana@jsmp.tl
info@jsmp.tl
Website: <http://jsmp.tl>